

四庫全書

史部

欽定四庫全書

宋朝事實卷十七

宋 李攸 撰

削平僭偽

孟昶初名仁贊及僭位改焉是時契丹破晉漢祖起并
門中原旱蝗連歲昶益自大君臣奢僭及太祖下荆楚
昶欲遣使朝貢王昭遠方總內外軍柄固止之太祖詔
蜀之邸吏將卒先在江陵者竝放還乃給錢帛以遣乾

德二年昶懼王師討伐潛遣謀者孫遇等間道齎蠟丸帛書結太原劉鈞為朝廷所獲其書云蚤歲曾奉尺書遠達睿聽丹素備陳于翰墨歡盟已保于金蘭洎傳弔伐之嘉音實動輔車之喜色尋于袞漢添駐師徒只待靈旗之濟河便遣前鋒而出境云云先是太祖已有西伐之意而未發及得書笑曰吾出師有名矣十一月詔曰朕奄宅萬邦于茲五稔陳師鞠旅出必有名伐罪弔民動非獲已睠惟庸蜀久限化風舞階詎識于懷柔干

紀自貽于禍釁近擒獲四川偽樞密大程官孫遇二人
搜得孟昶與河東劉鈞蠟書潛相表裏欲起寇戎致姦
謀之自彰蓋天道之助順將定一方之亂難稽六月之
師爰命將臣俾正戎律建靈旗而西指授成算以徂征
言念坤維久沈汙俗旣為民而除害必俟后以來蘇式
清全蜀之封止正渠魁之罪況西川將校多是北人所
宜翻然改圖轉禍為福苟執迷而不復雖後悔以何追
如能引導王師供饋軍食率衆歸順舉城來降咸推不

次之恩用啓自新之路重念征行之際宜申約束之大
已戒師徒務遵法令不得燔盪廬舍毆掠吏民開發丘
墳翦伐桑柘共體救焚之意以成不陣之功凡彼烝黎
勿懷憂慮故茲詔示知朕意焉于是命忠武軍節度使
王全斌充西川路行營前軍兵馬都部署武信軍節度
使侍衛步軍都指揮使崔彥進副之樞密副使王仁贍
充都監龍捷右廂都指揮使史延德充馬軍都指揮使
隴州防禦使張凝充先鋒都指揮使左神武大將軍王

繼儔充壕寨使內染院使康延澤充馬軍都監翰林副
使張煦充步軍都監供奉官田仁明充壕寨都監殿直
鄭璫充先鋒都監步軍頭目向韜充先鋒都軍頭目全
斌而下率禁軍步騎二萬諸道兵一萬由鳳州路進討
以給事中沈義倫為隨軍水陸轉運使又以寧江軍節
度使侍衛馬軍都指揮使劉光義充歸州路行營前軍
兵馬副都部署內客省使樞密承旨曹彬充都監客省
使武懷節充戰棹部署龍捷左廂都指揮使張廷翰充

馬軍都指揮使虎捷左廂都指揮使李進卿充步軍指揮使前階州刺史高彥暉充先鋒都指揮使右衛將軍白廷誨充壕寨使御廚副使朱先緒充馬軍都監儀鸞副使折彥贊充步軍都監八作副使王令岳充先鋒都監供奉官郝守濬充壕寨都監馬步軍都軍頭楊光美充戰棹左右廂都指揮使供奉官藥守正充戰棹左廂都監殿直劉漢卿充戰棹右廂都監自光義而下率禁軍步騎一萬諸道兵一萬由歸州路進討以均州刺史

曹翰為西南面水陸轉運使詔令孫遇等指畫江山曲折之狀及兵寨城守之處道里遠近俾畫工圖其險要上以授全斌等仍令所至之處以前詔告諭偽將吏軍民等上問全斌曰西川可取否全斌等對曰臣等仗天威遵廟算刻日可定龍捷右廂都校史延德奏曰西蜀一方儻在天上人不能到固無可奈何若在地上以今日之兵力到卽平矣上壯其言喜曰汝等果能如此我何憂哉帝又謂全斌等曰凡克城寨止籍其器甲芻糧

悉以錢帛分給戰士勿害良民十二月全斌等收復乾
渠渡萬仞燕子二寨下興州偽刺史藍思綰退保西縣
官軍敗蜀軍七千人獲軍糧四十餘萬石乘勝連拔石
圖魚關白水閣二十餘寨二十八日詔曰命將出師指
期殄寇今所向皆下捷音繼來方乘破竹之功更示戰
兵之令如聞收復州縣其偽署軍員兵士或投竄山林
或散匿民舍俾安疑懼特用招懷詔到限一月許于逐
處首身更不問罪是月史延德等進軍至三泉寨敗蜀

軍數萬人生獲偽招討使山南節度使韓保正副使洋

州節度李進等又獲軍糧三千餘萬石三年正月劉光

義等收復三會巫山等寨殺偽將南光海等三千餘人

案李燾長編光義等收復三會巫山等寨在乾德二年冬十二月此在三年正月又宋史殺偽將南光海等八

千此作三千餘人彼此互異生擒戰棹都指揮使渝州刺史袁德宏

等千二百人奪戰艦二百餘艘又殺水軍三千人

案長編作

殺水軍拔夔州偽節度高彥儔縱火自焚

原註初光義等行帝以地

圖示之指夔州鎮江處謂光義曰我軍至此汭流而上慎勿以舟師爭先當先令步騎前行出其不意而擊之

俟其稍卻即以戰棹夾攻敗之必矣及捷奏至帝問其狀果如所料詔蜀中偽將士死于

兵力暴露原野者所在郡縣速收瘞之又詔行營兵戰陣被傷者等第給賜繒帛八日詔行營馬步兵士及諸道義軍所經之處長吏以牛酒犒之王全斌進拔利州得軍糧八十萬石崔彥進康延澤等逐蜀兵過三泉殺戮擄獲甚衆遂至嘉州進擊金山寨不破蜀人依小漫天寨至深渡旁江列陣以待我師彥進遣張萬友等擊之奪其橋會天暮蜀人退保大漫天寨詰朝彥進萬友

與康延澤分兵三道擊之蜀人悉以精銳來拒又大破

其衆乘勝奪其寨擒寨主王審超監軍趙崇渥又獲三

泉監軍劉延祚蜀將王昭遠引兵來救遇我師三戰三

敗追至利州北昭遠遁去渡桔柏江焚浮橋退守劍門

王師遂入利州

原註先是官軍至嘉州會蜀人斷閣道未得進王全斌議欲取羅川路遂入康

延澤謂彥進曰羅川路險諸軍難進不如督工修閣道取大路與全斌會于深渡彥進然之不數日閣道成遂

進全斌等旣收復劍州殺蜀兵萬餘人生擒偽都監通

奏使知樞密院事山南節度使王昭遠

原註王昭遠居常好大言有雜

耕渭上之志聞王師壓境對賓客援手言曰此送死來爾乘此追之當遂定中原不煩再舉也及此兵敗奔匿官倉中凡不食數日擒獲繫馬步軍都指揮使前洋州送京師後歷諸衛大將軍卒

節度使趙崇韜

原註先是王師發利州至益光全斌會諸將各陳進取之計侍衛軍頭向韜曰

得降卒牟進言益光江東大山數重有小路名來蘇蜀人于江西置寨對岸可渡路出劔門南二十里至青彊店與大路合可于此進兵則劔門之險不足恃也全斌即欲領兵赴之康延澤曰來蘇小路無煩王師自往蜀人已與官軍相遇數戰數敗今聞併兵守劔門不知諸師協力可命偏將趨來蘇直達青彊北至劔門與大兵夾攻破之必矣全斌等然之遂命史延德等分兵趨來蘇造浮橋于是蜀人見兵至來蘇又見橋成棄寨而遁昭遠聞延德至青彊即退兵陣于漢源坡上留偏將守劔門全斌等以銳師直擊走破之昭遠崇韜又遁走全

武遣輕兵追劉光義等收復萬施開忠四郡至遂州偽之皆生致焉

知州少府少監陳愈率其將吏出降光義即日入城安

撫盡出府庫錢帛以給軍士

原註初諸將入辭帝戒曰所復郡縣當發帑藏為朕

賞戰士國家所取惟土疆耳至是人皆効命所至成功如席卷之易王師由劔門而入昶

益惶懼問計于左右有老將石斌

案石斌長編作石斌奉顧此與宋史合對

以王師遠來勢不能久請聚兵固守以老之昶歎曰吾

父子以豐衣美食養士四十年及遇敵不能與我東嚮

發一箭今若閉壘何人與我効命乃遣偽通奏使伊審

證齋表詣全斌請降其表曰三皇御宇萬邦歸有道之
君五帝垂衣六合順無為之化其或未知歷數猶昧死
亡致興貔虎之師實懼雷霆之怒敢祈英睿俯聽哀鳴
伏念臣生自并門長于蜀土幸以先臣之基業獲從幼
歲以纂承只知四序之推遷不覺三靈之改卜爰自大
明出震盛德居尊聲教被于遐荒慶澤流于中夏當凝
旒正殿虧以小事大之儀及告類圜丘曠執贄奉琛之
義素居遐僻久阻聲明曾無先覺之心固有後時之責

今則皇威電赫聖略風馳干戈所指而無前聲鼓纔臨
而自潰山河郡縣半入于提封將卒倉儲盡歸于圖籍
且念臣中外骨肉二百餘人高堂有親七十非遠弱齡
侍奉只在庭闈日承訓撫之恩粗勤孝養之道實願克
修甘旨保此衰年次望免子孫之睽離守血食之祭祀
敢冀容之如地蓋之如天特軫仁慈以寬厄辱臣輒援
故事上瀆嚴聰竊念劉禪有安樂之封叔寶有長城之
號皆自歸款盡獲生全願眇昧之餘魂得保家而為幸

使先臣寢廟不為樵採之場老母庭闈尚有問安之所
已令絨封府庫肅靖軍資用付典司將期臨照今則車
書混其文範正朔奉以靈臺敢布腹心恭聽赦宥臣昶
謹率文武見任官望闕再拜上表歸命披瀝肝膽以聞
全斌等既受其降遣馬軍都監康延澤先以百騎入城
見昶諭以恩信留三日盡封府庫而還昶又遣其弟仁
贊詣闕上表曰臣歷觀先覺克奉忠區實融受累世之
封吳芮襲傳家之慶愚者暗于成事智者見于未萌則

臣在執迷以何多致顛沛之如是罪豈容于擢髮形可
寘于磔尸既無遠慮之明甘受後期之責伏念先臣受
命唐室建牙蜀川因時事之變更為人心之擁迫先臣
即世臣方壯年猥以童蒙謬承餘緒乖以小事大之禮
闕稱藩奉國之誠染習偷安因循積歲所以上煩神算
遠發王師勢甚疾雷敏如破竹顧惟懦卒焉敢當鋒尋
束手以云歸正傾心而俟命今月七日已令私署通奏
使宣徽南院使伊審證奉表歸降以前路寇攘前進不

得臣尋更令兵士援送至十一日尚恐前表未達續遣供奉官王茂隆再齎前表至十二日以後相次方到軍前料惟血誠上達睿聽臣今月十九日已領親男諸弟納降禮于軍門至于老母諸孫延餘息于私第陛下至仁廣覆大德好生顧臣假息于數年所望全軀于今日今蒙元戎慰卹監護撫安若非天地之垂慈豈見軍民之受賜臣自量過咎尚切憂疑謹遣親弟詣闕奉表待罪以聞太祖賜詔曰朕以受命上蒼臨制中土姑務保

民而崇德豈思右武而佳兵至于興戎蓋非獲已矧惟
蜀郡僻處一隅靡思僭竊之愆輒肆窺覲之志潛結并
寇自起釁端爰命偏師往申弔伐靈旗所指逆壘自平
朕常中夜撫然念兆民何罪屢馳驛騎嚴戒兵鋒務宣
拯溺之懷以盡招攜之禮而卿果能率官屬而請命拜
表疏以祈恩託以慈親保其宗祀悉封府庫以待王師
追咎改圖將自求于多福匿瑕含垢當盡滌于前非朕
不食言爾其無慮昶乃舉族與官屬由峽而下至江陵

上遣皇城使竇儼迎勞之昶與母至襄陽復遣使齎詔賜茶藥所賜詔不名仍呼昶母為國母昶將至命太宗勞于近郊昶率子弟素服待罪闕下時乾德三年也帝以昶來降意嘉之詔翰林學士承旨陶穀等約前代儀制草定受降之禮正月十六日昶至前一日有司設御座于崇元殿陳伏衛于庭如元會之儀又為昶及偽官屬設次于明德門外設表案于門橫街之北是日大陳馬步諸軍于天街左右昶及弟偽官李昊等三十二人

至闕下皆素服紗帽通事舍人引昶于表案南序立北
向偽官屬皆班于昶後置待罪表于案昶跪授閣門使
持表入昶等還位序立以俟命表至帝前侍臣讀訖閣
門使承旨出宣昶等悉俯伏于地通事舍人二員掖昶
起偽官屬皆起竝鞠躬聽命閣門使宣制釋罪昶等再
拜三呼萬歲閣門使又承旨賜昶等襲衣冠帶衣庫使
導所賜陳于前昶再拜跪受各就次易服乘馬昶至升
龍門下馬官屬至啓運門下馬就次入見于崇元殿帝

袞服升座軸簾卻扇大武百官先入起居訖分班東西相向閣門使引昶等入起居舞蹈稱謝宣徽使承旨喚昶升殿昶等皆再拜偽官屬依位序立通事舍人引昶升自東階宣徽使承旨安撫至御座前鞠躬帝親撫問之昶還位與官屬皆舞蹈再拜三呼萬歲昶出中書門下率百僚稱賀禮畢御明德門宣赦門下伐罪弔民所以昭宣王略肯災肆赦所以盪滌羣非稽有國之舊章蓋哲王之能事朕飛龍撫運躍馬興邦雖禹別九州盡

為王土而蜀川一境猶隔華風天兵飛渡于劍門蜀主
哀號而納款念其生聚曲為保全宜推曠蕩之恩用慰
傷殘之俗易苛政以平恕革重斂為輕徭用舉宏綱正
我王度自乾德三年正月二十四日昧爽以前應偽蜀
管內罪無輕重常赦所不原者咸赦除之自乾德二年
終所有殘欠租稅竝與除放仍特放今年夏稅及沿納
諸雜物色等一半兼令逐州子細分析自前諸色稅賦
及科配煩重名目開奏當與等第永遠減放應敗闕場

務仍各具事申奏當議指揮西川城內人戶食鹽偽冒
估定每斤一百六十文足陌令每斤特減六十文足陌
今後只定一百文足陌所有諸州鹽各取逐處價例三
分中與減一分應鄉村不濟人戶闕少糧食者委逐處
官吏開倉賑貸候豐熟日令人戶一斗只納一斗昨者
收復之際亦已嚴切指揮或慮諸軍攜得丁口便仰各
放還本主不得更有隱藏如敢固違當行嚴斷其偽蜀
内外文武臣僚及將校職員等能奉其主歸我大朝念

茲通變之方宜預旌酬之寵各令分析名銜申奏當與
加恩管內應有負罪逃竄之人亡命山林之輩限赦到
一月內許自陳首竝仰放罪仍令逐處長吏倍加安撫
如限滿不自陳首復罪如初乃矐劍南北為內地自累
朝之艱否據千里之江山豈無沈滯之人宜下旁求之
詔所在州郡及山林有懷才負藝未霑寸祿者委長吏
聞奏先賢丘壠不得樵採古來廟宇咸與修崇其餘節
婦義夫順孫孝子有堪旌賞當議舉明官吏軍民各勤

職業樂予景運當慶新恩告示一方咸知朕意是日宴
近臣及昶等于大明殿昶奉觴上壽是日又賜昶玉帶
金鞦勒馬金器千兩銀器萬兩錦綺千段衣著萬匹賜
昶母李氏金器三百兩銀器二千兩錦綺千段絹千匹
自仁贊玄喆李昊等恩賜各有差先是帝詔有司于右
掖門街臨汴水起大第五百間以待昶供帳悉備至是
賜之又為其偽官屬各營居第翼日詔曰伯禹導川黑
水本梁州之域河圖括象岷山直井絡之墟是曰坤維

素為王土屬中原多故四海羣飛遂割裂于山河競僭
竊于位號朕削平寓縣載整皇綱復周漢之舊疆寵綏
羣后采唐虞之大訓協和萬邦六年于茲百揆時叙禮
樂征伐之柄盡出朝廷蠻夷山海之君咸修職貢一昨
順長庚而授律法時雨以興師先申誕告之文以慰徯
來之衆咨爾偽蜀主孟昶克承餘緒保據一隅擅正朔
以自專歷歲年以滋久而能屬王師之致討察天道之
惡盈體此綏懷思于効順盡率官吏來降軍門抗手疏

以陳誠伏天闕而請命是用昭示大信盡滌汝瑕度越
彝章升于崇秩冠紫微之近署以奉內朝翦鶉首之奧
區為之封邑率從異數式洽殊私爾宜欽承往踐厥位
可開府儀同三司檢校太師兼中書令秦國公給上鎮
節度使俸祿餘偽官除拜有差昶數日卒年四十七太
祖廢朝五日素服發哀于大明殿贈中書令追封楚王
諡恭孝賻布帛千匹葬事官給後數日其母李氏亦卒
初李氏隨昶至京師太祖數命肩輿入宮勞之曰母善

自愛無戚戚懷鄉土異日當送母歸李氏曰使妾安往
太祖曰歸蜀爾李氏曰妾家本太原儻得歸老并土妾
之願也時晉陽未平太祖聞其言大喜曰俟平劉鈞即
如母所願因厚加賜賚及昶卒不哭以酒酹地曰汝不
能死社稷貪生以至此吾所以忍死者以汝在爾今汝
既死吾何生焉因不食數日卒太祖聞而傷之賻贈加
等與昶俱葬洛陽詔發奉義甲士七千人護送七月正
衙備禮冊命昶其大曰維乾德三年歲次乙丑七月己

未朔二十四日戊子

案朔日是巳未則二十四日是壬午若二十四日是戊子則朔日是壬

乙丑據宋史太祖本紀七月壬辰追封孟昶為楚王下書丁酉又書八月戊戌朔是七月巳巳朔二十四日壬

辰附註
備攷

皇帝若曰咨爾故檢校太師兼中書令秦國公

孟昶夫冊贈之典所以彰世祚而紀勲伐繼絕之義所以旌異域而表來庭苟匪全功寧兼二者國家承乾撫運括地開圖稽至德于勲華體深仁于湯禹既定壺關之亂復翦淮夷之兇暨荆及衡洗蕩逋穢以為人君之道先德而後刑王者之師有征而無戰兵威震疊寰宇

來同以致薄伐西川徂征三峽惟爾袒襲乃堂構據有
巴庸而能祇畏皇靈保全宗緒知機識變委順圖全馳
子牟魏闕之心奉伯禹塗山之會朕自聞獻款良切虛
懷舟車欣至止之初卽第錫非常之制封崇異數期保
永年景命不融奄然殂謝嗚呼爾有及親之孝特異常
倫爾有奉上之情所期終養何高穹之不祐與幽壤以
同歸斯朕所以當寧興悲徹縣永歎詢于史氏申命禮
官今遣使起復雲飛將軍檢校太傅右神武統軍兼御

史大夫上柱國平昌縣開國伯食邑七百戶孟仁贊持
節冊贈爾為尚書令仍追封楚王嗚呼式備哀榮載光
簡牒南宮峻秩全楚大邦併示追崇夔超彝制始終之
分朕無愧焉尚冀英魂歆茲盛禮嗚呼哀哉禮畢其冊
載以犢車設鹵簿鼓吹導至其第冊及門主人迎冊使
入是日仍賜袒墳莊一區給守墳人米千石錢五十萬
案宋史作五萬初袒在蜀專務奢靡為七寶溺器他物稱是每
歲除命學士為詞題桃符置寢門左右末年學士韋寅

遜撰詞以其非工昶自命筆題云新年納餘慶嘉節號
長春昶以其年正月十一日降太祖命呂餘慶知成都
而長春乃太祖誕聖節名也又昶襲位後民質錢取息
者將徙居必書其門曰召主取贖其末年西川婦女競
理髮為高髻號朝天髻始周世宗平淮甸克關南議討
而未果至太祖乃平之自始伐至降凡六十六日昶父
子據有二蜀三十一年至是國除王全斌既平蜀部下
多漁奪民財及凱旋太祖盡得其狀召行營都監王仁

瞻面詰之仁瞻歷詆諸將所為奢縱不法冀以自解且

曰清廉畏慎不辜陛下任使者惟有曹彬一人耳即日

授彬宣徽南院使彬入奏曰征西諸將皆獲罪臣獨受

賞何以寧處上曰卿有功無過又不自矜苟若有纖芥

之累王仁瞻豈有為卿隱耶勸懲國之常典可無讓也

蜀平得州府四十六益彭眉嘉緜漢資簡梓遂黎雅陵

戎瀘維茂昌榮原註
闕文聞渠合龍普利原註
闕文渝涪黔施達

洋原註
闕文百四十戶五十三萬四原註
闕文案長編蜀

平得州四十六縣二百

四十戶五十三萬四千二十九宋史載得州
四十五縣一百九十此書大略與長編相合

李筠在鎮擅其征賦頗招集亡命嘗以私忿囚監軍使
世宗不能堪但下詔責讓而已至是遂以建隆元年四
月十四日叛太祖遣侍衛親軍副都指揮使歸德軍節
度使石守信殿前副都指揮點檢義成軍節度使高懷
德率諸軍進討五月二日又命宣徽南院使晷居濶赴
澶州巡警詔殿前都點檢昭化軍節度使慕容延釗彰
德軍節度觀察留後王全斌由東路會兵進討前德州

刺史曹翰前耀州刺史張暉竝充行營壕寨使由東路
與守信等合敕守信等曰勿縱筠下太行急進師扼其
隘破之必矣帝乃下詔曰違天逆命不可以逋誅伐罪
弔民式慰其徯望昭義軍節度檢校太師兼中書令李
筠出于賤隸驟列通侯詭譎多端包藏有素朕以皇天
眷命歷數在躬念同事于前朝每曲形于厚禮推赤心
而示信指天日以申盟而不體予懷自隲爾節窺覲神
器假擾天常因辱使臣虔劉民吏結劉筠于并壘害張

福于高平肆其兇謀于我大戮國有常憲人其舍諸將
申齊斧之刑用致靈旗之討李筠宜削奪在身官爵令
諸道會兵進擊宥其驅脅實前王之令猷示以招懷亦
吾民之何罪黎城舊壤上黨名區俗本貞純人知節義
豈私從亂必自改圖苟去危以就安可轉禍而為福立
功名于當世保富貴以終身勿成染汙之風自取覆亡
之咎凡爾士庶當體朕懷五月十九日內降手詔親征
朕仰膺天睠肇啓皇圖念可畏之非民敢無名而動衆

李筠不知天命犯我王誅棄帶河礪嶽之恩為千紀亂
常之事已行攻討即俟盪平當九夏之炎蒸念六師之
勞苦深居宮闕情所難安當議省巡用伸慰撫朕取此
月內暫幸軍前所司供頓務從儉約郡國長吏不得擅
赴行在兩京留司官起居表章傳置以聞勿令勞擾以
稱朕意以二十四日次滎陽西京留守向拱河陽節度
使趙鼎來朝太祖召拱與語拱曰李筠逆節久露兵勢
漸盛陛下宜速濟大河歷太行乘其未集而擊之平賊

必矣若稽留浹旬臣恐賊鋒益熾攻之難力矣帝深然之其月石守信敗筠軍于長平斬首三千餘級拔大會寨十九日命侍衛親軍都指揮使天平軍節度使韓令坤率兵屯河陽石守信高懷德又破筠衆三萬于澤州獲偽河東節度使范守圖降河東援軍數千皆殺之

原註

初筠送款于河東劉筠及王師至筠求援于鈞筠遣守圖等赴之至是并獲焉帝以親駕大赦

天下門下天生五材武可以底寧禍亂君有一德恩所以輯睦兆民爰自睦命自天膺圖開國繫朕寡昧勉徇

樂推式造新邦務求治道郡縣小大之政必切躬親蕃
宣勲舊之臣敢忘禮遇以四海樂康為念以一物失所
為憂勿敢怠荒庶期開泰不謂壺關之地分野纏災守
臣無事以生疑同惡望風而相濟朕推心勉諭屈已俯
從和氣不能易豺狼之心平地于是作荆榛之路昨者
長驅禁旅直上太行始戮賊軍尋平澤潞鋒矢接瓦
解冰消潞州既逼危亡尋輸降款契我好生之意各覃
加等之恩一境熙春萬家安堵既豁黔黎之望實憑宗

社之靈重念將士同心服干戈而展効官吏奉職卹力役以有勞將同慶于域中宜大賚于天下應天下見禁

罪人自六月二十三日昧爽以前云云

原註餘同本傳

李重進九月反狀聞太祖遣石守信王審琦李處耘宋

偓等四將率禁兵討之仍令友規護前軍

案仍令云云當是上文已

載友規為傳寫者脫佚據長編揚州都監右屯將軍安友規知重進必反踰城來奔至是果反故仍令護前軍

討之乃下詔曰黃軒御極嘗行中冀之誅虞舜登庸先正

四凶之罪茫民靖亂何莫由斯朕以歷試艱難肇膺眷

命務輯寧于華夏思康濟于黎元爰整銳師濯征多壘
慰其僕后匪曰佳兵新授平盧軍節度淄青等州觀察
使檢校太師兼中書令李重進位列公侯任隆藩翰自
皇家之起運包異志以無君朕法天無私與物更始特
含垢以宥罪聽改行而自新申撫諭于璽書形誓言于
金券特遷大鎮用保永圖而敢固守孤城拒違王命此
而可忍孰不可忍宜正彝章用懲大慙其李重進在身
官爵竝宜削奪上謂左右曰朕于周室近臣無所圖間

重進不體朕心自懷反側今大師在野朕當自慰撫之
十月二十一日內降手詔曰朕以反臣負國兇黨嬰城
勞將帥以征行救生靈之塗炭重念蒙犯霜露跋涉山
川將親示于撫循須暫離于京闕朕取今月內幸揚州
凡所供須務令省約方期靖亂無至勞人餘依征澤潞
詔書從事

原註餘
同本傳

陳洪進入朝以其地來歸太宗優詔嘉納之以洪進為
武寧軍節度同平章事留京師奉朝請諸子皆授以近

郡五月一日降德音門下朕纂紹基圖臨御區宇慶五
兵之銷偃致四海之混同顧惟動植之間悉被生成之
澤念清源之一境隔朝化以多年江山雖在于照臨黎
庶未霑于恩惠節度使陳洪進素懷明略喜遇昌期偃
戎節以來朝錄地圖而上進今者川塗無壅聲教大同
宜覃寬宥之恩俾洽維新之化應泉漳等州管内州縣
諸色罪人限德音到日竝從釋放云云於戲同文共軌
荷宗社之殊休恤物愛民乃帝王之常道矧惟遠俗初

被皇風用安歸嚮之心倍注撫柔之意降九天之雨露
蘇比屋之生靈必令其萬戶千門永樂于輕徭薄賦凡
爾衆庶當體朕懷主者施行

太宗征太原次澶淵太僕寺丞宋捷者掌出納行在軍
儲迎謁道左太宗見姓名喜以為我師有必捷之兆車
駕將至令語攻城諸將曰我端午日置酒宴會于太原
城中至癸未繼元降乃五月五日也

太宗朝平蜀賊李順

原註劉
旰附

淳化四年青城縣民王

小波聚徒起而為亂謂其衆曰吾疾貧富不均今為汝均之貧民附者益衆先是國家平孟氏之亂成都府庫之物悉載歸于內府後來任事者競功利于常賦外更置博買務禁商旅不得私市布帛蜀地土狹民稠耕稼不足以給由是羣衆起而為亂二月殺彭山縣令齊元振十二月與巡檢張玘鬪于江原縣玘死之小波亦病創卒衆推小波妻弟李順以淳化五年正月叛攻邛蜀二郡官吏多被其害又敗都巡檢郭允能于新津賊勢

益盛衆附者數萬永康軍雙流新津溫江郫縣皆為順
所陷縱火大掠遂進攻成都既陷成都知府事郭載率
官吏奔東川賊遂據成都上命昭宣使河州團練使王
繼恩為劍南兩川招安使率兵討之以便宜決遣又命

樞密直學士張詠知成都府

案長編據成都志及宋祁所作墓誌韓琦所作碑謂

詠知成都乃是春除既而留不行至九月代雷有終任實錄及會要並于是春即書以張詠知成都誤矣此書亦仍實錄雷有終裴莊劉錫周渭等掌川峽隨軍漕運
會要之誤

馬步軍都軍頭王杲率兵趨劔門崇儀使尹元率兵由

峽路而進竝受繼恩節制又命成都府監軍供奉官宿

翰為崇儀使先是羣盜自成都分攻劔門翰先自成都

領兵投劔門適與正兵合

案長編李順分兵攻劔門都監西京作坊副使上官正禦

之會宿翰領兵至破之上喜以正為六宅使劔州刺史充劔門兵馬部署翰為崇儀使昭州刺史此云與正兵

合不載上官之姓當是上文有脫佚因迎擊大破賊眾數千人餘三百人

奔歸成都順怒其驚眾盡殺之奏至上嘉翰功故有是

命三月詔繼恩朕以允民嘯聚蜀郡驚駭俾聊舉于軍

師務速令于平盪已聞虎旅將覆梟巢既顯戮于鯨鯢

慮俱焚于玉石頃令分別用振恩威宜令王繼恩候前
軍所到處其賊黨等或敢恣兇頑或輒行拒抗即盡加
殺戮不得存留其有或先被脅從或自能歸順更不問
罪竝與安存不惟推好生惡殺之心亦用舉懲惡勸善
之典諒爾將兵之意知予及物之恩四月繼恩由小劔
門路入研石寨破賊斬首五百級遂北過青彊嶺平劔
州進破賊五千衆于柳池驛斬首六百級賊衆望風奔
走殺戮溺死者不可勝計又克閬縣二州五月至成都

破賊十餘萬斬首三萬級獲順及偽官甚衆及議賞功
中書欲除宣徽使太宗曰朕讀前代書史不欲令宦官
預政事宜徽使執政之漸也止可授以他官宰相懇言
繼思有大功非此任無足以議賞典上深怒責丞相等
命學士張洎錢若水議別立宣政使序位于昭宣使之
上以授之繼思握重兵久留成都轉餉不給專以飲宴
為務每出入前後奏音樂又令騎兵執博局棊枰自隨
威振郡縣僕使輩用事恣橫縱所部剽掠子女金帛坐

而翫寇軍士亦無鬪志餘賊竄伏山谷間州縣有復陷者太宗知之乃命入內押班衛紹欽同領其事命給事中參知政事趙昌言充川峽路兵馬都部署自宣政使王繼恩以下皆聽其節度御札數幅丁寧授以方略姦黨悉平至道二年春布衣韓拱辰詣闕上言繼恩有平賊大功當秉機務今薄賞無以慰中外之望上大怒以拱辰妖言惑衆杖脊黥面配崖州俄召繼恩還又有劉盱者廣武指揮軍卒也至道三年八月都巡檢使韓景

祐至懷安軍盱謀殺景祐而叛是夜三鼓嘯聚軍士遂
景祐景祐踰垣遁逸遂掠懷安及漢蜀邛州永康軍招
安使上官正即與鈴轄馬知節領兵趨新津賊出邛州
方井擊敗之斬盱盡平其黨九月太宗因言西川叛卒
事輔臣或曰蓋地無城池所以失其制禦上曰儻官吏
得人善于綏撫使其樂業雖無城可也昌言為人辯智
于上前指畫破賊之策上悅之恩遇甚厚既行時有峨
眉山僧茂真以術得幸謂上曰昌言額紋有反相不宜

委以蜀事上方悔之會昌言至鳳翔是時寇準知州密
上言趙昌言素有重名又無子息不可征蜀授以兵柄
太宗得疏大驚曰朝廷皆無忠臣言莫及此賴有寇準
憂國家爾乃詔昌言以軍事付王繼恩罷知政事以戶
部侍郎知鳳翔召寇準參知政事西川招安使王繼恩
部送賊酋句重榮等五輩詣闕上曰汝曹本非為惡但
官吏失于撫御致爾為盜及兵興武人務在立功肆行
殺戮爾輩懼死亡命耳朕今諭以恩信不忍誅也皆釋

甲放之太宗聞蜀賊起顧侍臣曰蜀土之民近歲日益繁盛但習俗囂浮多事邀賞物極必反今小寇驚動豈天意抑其浮華耶呂蒙正曰昔楚莊小國之君常懼無災今昇平之代遠方忽有狂寇亦恐天垂警戒呂端曰蒙正之言望陛下留意上深納之

宋朝事實卷十七

欽定四庫全書

史部

宋朝事實卷十八至末

詳校官編修臣范來宗

編修臣程嘉謨覆勘

總校官降調編修臣倉聖脉

校對官中書臣張敦培

謄錄監生臣丁煌

欽定四庫全書

宋朝事實卷十八

宋 李攸 撰

陞降州縣一

東京

開封府 大中祥符二年

案宋史地理志作三年

改浚儀縣為祥

符縣復後唐匡城縣為長垣縣

原註梁名長垣史隋匡城縣建隆元年

案宋

改為鶴丘後乃改長垣

建隆四年陞東明鎮為東明縣以濟陽

鎮屬縣 咸平五年陞通許鎮為咸平縣

案此書于各府州所領縣

沿自前代者皆不記惟記自建隆迄紹興陞改者據宋史謂政和七年改酸棗縣為延津則事在宣和以前此書不應闕載然文獻通攷仍存酸棗舊名而不著延津其互異未審所由今就二書之顯與此書不同者附註各條下以備參證

西京

河南府 熙寧八年

案宋史作五年

省洛陽縣入河南縣元祐

二年復置 熙寧八年省緱氏縣入偃師縣 熙寧五

年省伊闕縣入伊陽縣

案文獻通攷景德四年升永安鎮為縣屬京西路此闕載

南京

應天府

景德四年

案宋史作三年

陞歸德軍為應天府大中

祥符七年陞南京

北京

大名府

慶厯二年陞大名為北京

案文獻通考熙寧六年省經城縣為

鎮入宗城縣省洹水縣為鎮入成安縣此闕載

京東東路

青州

淳化五年改為鎮海軍節度使

原註唐為平盧軍節度

政

和元年曰齊郡

密州

開寶五年陞為安化軍節度

案文獻通攷元祐三年以板橋鎮置

膠西縣此闕載

拱州 崇寧四年以開封府襄邑縣建州名輔州以為

東輔又改今名

案文獻通攷大觀四年廢拱州復為襄邑縣還隸開封政和四年復為州此闕

載又通攷及宋史並云屬京東西路與此屬京東東路有異

齊州 治平二年陞為興德軍節度 咸平四年省臨

濟縣入章丘縣

案文獻通攷政和六年陞齊州為濟南府又云景德三年以章丘置清平軍熙

寧三年廢軍復
為縣此皆闕載

濰州 建隆三年以青州北海縣置北海軍乾德二年

陞為濰州政和元年曰北海郡 建隆三年析北海縣

地置昌邑縣 乾德三年以營丘城置安仁縣尋改為

昌樂

淮陽軍 太平興國七年置 太平興國七年以徐州

之宿遷縣屬淮陽軍

案文獻通攷云以徐州之下邳宿遷二縣建淮陽軍元豐初改屬京

東西路與

此稍異

欽定四庫全書

京東西路

襲慶府

建隆元年復泰寧軍節度

案文獻通攷大中祥符元年陞泰寧

軍節度為大都督政和八年陞為府

大中祥符元年改乾封縣為奉符

縣 大中祥符元年

案文獻通攷作五年

改曲阜縣為仙源縣

案宋

史大觀四年以瑕丘縣為瑕縣以襲丘縣為襲縣此闕載

興仁府

建中靖國元年改周彰信軍為郡後陞府

案宋

史作崇寧元年陞曹州為興仁府

大觀三年陞都督府 大觀二年

改宛句縣為宛亭縣

案宋史作元祐元年改宛句縣為宛亭

鄆州

大觀二年陞大都督府

案宋史作大觀元年陞大都督府宣和元年改

為東平府

廣濟軍 太平興國三年以定陶鎮置廣濟軍至熙寧

四年廢屬曹州元祐元年復置

案文獻通攷云漢定陶縣唐為鎮太平興國二

年建為軍四年割曹澶濟濮四州地復置縣以隸焉熙寧四年廢軍以定陶縣隸曹州元祐元年復為軍視此

所記覺更明晰

鄧州 建隆初省臨瀨縣入穰縣

案宋史太平興國六年陞順陽鎮為順陽

縣慶厯四年廢方城縣入南陽縣此皆闕載

襄州 乾德三年以陰城鎮置乾德縣

案文獻通攷陰城鎮宋初陞為

光化軍熙寧五年廢軍改為光化縣隸襄陽元祐初復為軍又宋史云乾德二年析穀城縣三鄉置乾德縣與

此所記互異

太平興國元年復改義清縣為中廬縣

均州 乾德六年省豐利縣入鄖鄉縣

案宋史均州本防禦宣和元年

為武當軍節度此闕載

隨州 乾德五年陞崇義軍節度太平興國元年改崇

信軍 熙寧元年省安化縣

案宋史作熙寧元年廢光化縣為鎮入隨縣與元和

郎縣志隨州管縣有光化之又相合而與文獻通攷熙寧五年改光化軍為光化縣隸襄陽及此作元年省安

化縣者先後沿革互有歧異

金州 乾德五年陞昭化軍節度後為防禦 熙寧六

年省平利縣

案宋史作省為鎮入西城縣

元祐二年復置

案宋史乾德四年廢

渚陽縣入洵陽縣此闕載

房州 雍熙三年陞保康軍節度 開寶中省永清縣

開寶中省上庸縣

京西北路

潁昌府 元豐三年陞許州為府

原註唐為潁川郡陞忠武軍節度梁為匡

國軍後唐復
為忠武軍

崇寧四年建為南輔 熙寧四年省許田

入長社縣 崇寧四年以汝州之郟縣屬潁昌府

鄭州 景祐元年陞奉寧軍節度崇寧四年建為西輔

崇寧四年以河南府密縣屬鄭州

滑州 太平興國四年改武成軍節度 原註唐為宣
義軍節度 治

平三年 案宋史作
熙寧三年 省靈河縣入白馬縣

孟州 大中祥符中改汜水縣汜水關為行慶關 慶

歷三年以唐洛州王屋縣屬孟州 案宋史汜水縣熙寧
五年省入河陰元豐

二年復置王屋縣熙寧五年自河南來隸此未詳

蔡州

景祐二年陞淮康軍節度

案宋史大中祥符五年改即山縣為確山

縣此
闕載

陳州

案文獻通攷陳州宣和元年陞為淮寧府此未詳

建隆元年改潁水縣

為商水縣

熙寧六年省南頓縣入商水元祐元年復

置

順昌府

元豐二年陞順昌軍節度政和六年陞為潁

州府

案文獻通攷作政和六年改為順昌府

汝州

熙寧四年

案宋史作五年

省龍興縣入魯山縣元祐二

年

案宋史作元年

復置

案文獻通攷汝州政和中陞陸海軍節度又宋史魯山縣宣和二年改為寶豐

縣此皆闕載

信陽軍

唐義陽郡開寶九年降為軍太平興國元年

改為信陽

開寶九年省鍾山縣屬義陽開寶九年

以羅山縣屬信陽軍

案文獻通攷開寶九年廢羅山縣雍熙二年復置此未詳

河北東路

開德府

大觀元年陞府

原註唐屬澶濮魏三州晉陞鎮寧軍節度

崇寧四

年建為北輔 雍熙四年省臨黃縣入觀城縣 熙寧

四年

案宋史作六年

省頓丘縣入清豐縣 崇寧四年以大名

府南樂縣屬開德府

案宋史崇寧四年以大名府之朝城縣來隸此調載

河間府 大觀二年陞府

原註唐為瀛州宋初陞瀛海軍節度

熙寧六

年省束城縣入河間縣 熙寧六年省景城縣入樂壽

縣

案宋史樂壽縣至道三年自深州來隸熙寧六年省景城入焉又束城縣元祐元年復此未詳

冀州 慶厯八年陞安武軍節度 皇祐四年省堂陽

縣入南宮縣

欽定四庫全書

棣州 大中祥符八年徙州城及厭次縣于陽信縣地
徙陽信縣于故厭次縣

雄州 政和三年為易陽郡 太平興國元年改歸義

縣為歸信 建隆四年復置容城縣

原註周顯德六年廢

霸州 政和三年為永清郡 景祐元年

案宋史作二年省永

清縣入文安縣

莫州 熙寧六年省長豐縣為鎮又省鄭縣入任丘元

祐二年復鄭縣尋又罷為鎮

濱州 大中祥符五年省蒲臺縣入渤海縣慶歷六年

析渤海縣地置招安縣

案宋史慶歷三年陞招安鎮為縣熙寧六年省入渤海元豐二

年復為縣
與此互異

恩州 唐為貝州天寶初曰清河郡

案宋史宋初為節度慶歷八年罷節

度以平王則改
貝州為恩州

至和元年省漳南縣入歷亭縣

案宋史熙

寧四年省清陽縣
入清河縣此闕載

清州 太平興國七年以滄州永安縣置

原註周為乾寧軍後廢

大觀二年河清七晝夜因改為清州政和三年為乾寧

郡 太平興國七年以永安縣之范橋鎮置乾寧縣熙

寧六年省為鎮後復置縣崇寧三年又省之

案宋史乾寧縣政和

五年復置

此闕載

永靜軍 慶厯七年以將陵縣

原註周屬景州

屬永靜軍 淳

化元年以阜城縣

原註唐屬冀州

屬永靜軍

案宋史將陵縣景祐元年移治長河

鎮阜城縣嘉祐八年省入東光

熙寧十年復置與此詳略互異

保定軍 太平興國六年以涿州歸信縣新鎮置平戎

軍景德元年改今名

河北西路

相州 天聖七年改永定縣曰永和熙寧五年省入安

陽 熙寧五年省鄴縣入臨鄆

中山府 太平興國元年改定武軍節度

原註唐為定州義成軍節

度 政和三年改中山府為中山郡 康定元年省陘邑

縣入安喜縣 景德元年以祁州無極縣屬中山府

洺州 建隆元年陞為防禦 熙寧三年省曲周縣入

雞澤縣 熙寧六年省臨洺縣入永年縣

案宋史元祐二年曲周臨

治復為縣尋復為鎮四年曲周
難澤依舊別為兩縣此闕載

祁州 景德元年徙治蒲陰縣

原註周景福二年置祁州于無極縣

端

拱元年以恒州鼓城縣屬祁州

熙寧六年省深澤縣

入鼓城元祐元年復置

保州 政和三年為清苑郡

案宋史保州本清苑縣建隆初置保塞軍太平興國

六年建為州政和三年為清苑郡

太平興國六年改清苑為保塞縣

案宋史太平興國六年析易州滿城之南境入保塞此未詳

趙州

崇寧四年陞為慶源軍節度

開寶五年改昭

慶縣為隆平縣熙寧六年省入臨城元祐元年復置

熙寧五年省柏鄉贊皇入高邑縣

邢州熙寧六年省平鄉縣入鉅鹿縣元祐元年復置

熙寧六年省堯山縣入內丘縣元祐元年復置熙

寧五年省任縣入南和縣元祐元年復置大觀元年

八月二十六日詔遷趙州隆平縣邢州鉅鹿縣于高地

以隆平地下濕鉅鹿近為黃河陷沒故也政和三年

十二月十七日尚書省言邢州鉅鹿縣昨日黃河湮沒

之事今來水勢已退乞興復舊縣從之

永寧軍 雍熙四年以博野縣地置寧邊軍景德元年改永定天聖四年改今名

廣信軍 太平興國六年置為威虜軍景德元年改今名

陝西路

永興軍路

京兆府

案宋史永興軍大觀元年陞大都督府宣和二年詔守臣不用軍額

稱京兆府此未詳

大中祥符八年改昭應縣為臨潼縣 大

觀二年復以清平鎮置終南縣

原註唐為縣鎮案宋史清平鎮大觀元年陞

為清平軍復置終南縣隸京兆府清平軍使黃知終南縣與此紀年稍異而原委較詳

河中府

太平興國七年改護國軍節度

原註唐為河中節度案

宋史熙寧三年省西河縣六年省永樂縣入河東北闕載

陝西

太平興國元年改保平軍節度

原註唐為保義軍節度案宋

史熙寧六年省硤石縣並入陝縣太平興國三年以魏州之湖城關鄉二縣屬陝州北闕載

延安府

唐延州後唐彰武軍皇朝陞府

案宋史元祐四年陞府熙

寧五年省豐林縣金明縣入膚施八年省延水縣入延川縣北闕載

同州 太平興國七年陞為定國軍節度

案宋史熙寧四年省夏陽

縣入郃陽
此闕載

耀州 開寶五年為感義軍太平興國元年改感德軍

淳化四年以雲陽縣之梨園鎮置淳化縣

案宋史淳化縣宣和

元年撥屬環慶
路邠州此闕載

號州 建隆元年改弘農縣為常農縣至道三年改曰

號略熙寧四年省王城縣入號略

銀州 唐銀川郡

案宋史五代以來為西夏所有熙寧三年收復尋棄元豐四年復旋被西

夏陷沒宋寧四年復仍為銀州五年廢為銀川城此闕載

綏德軍 熙寧二年收復唐綏州又廢為綏德城後陞

為軍

案宋史熙寧二年作三年元符二年陞綏德軍與此稍異

保安軍 太平興國二年以延州永安鎮置軍天禧四

年置建子城天聖元年改為德靖寨慶厯四年置順寧

寨

環慶路

環州 淳化五年復周之通遠軍為環州 天聖四年

復改方渠縣為通遠縣

慶州

乾德二年復為安化郡

原註唐天寶元年曰安化郡至德元載曰順化

郡陞安定軍節度後唐降

乾德二年復順化縣為安化縣 乾德

二年省同川縣入安化縣 熙寧四年復置合水縣省

華池樂蟠兩縣入合水 熙寧三年以寧州彭原縣屬

慶州

涇原路

涇州

太平興國元年改彰化軍節度

原註唐為彰義軍

咸

平四年置保定縣五年省為寨大觀二年復置

案宋史咸平四

年陞長武鎮為縣五年省為寨屬保定縣大觀二年復為縣俱指長武言與此作保定有異

渭州 熙寧五年儀州廢以安化縣來屬 乾德元年

以舊崇信軍地置崇信縣屬鳳翔府淳化中屬儀州熙

寧五年州廢來屬 熙寧五年儀州廢以華亭縣來屬

案渭州宋史入秦鳳路與此入涇原路有異

原州 太平興國元年改寧州豐義縣為彭陽至道三

年屬原州

懷德軍 大觀二年陞平夏城為軍以蕭闕等寨

唐原蕭註

關縣地 來屬

鎮戎軍

至道元年

案宋史作三年

以故平高縣地置

德順軍

慶厯三年以渭州隴干城置

元祐八年置

隴干縣

秦鳳路

鳳翔府

熙寧五年以好畤縣屬府

隴州

開寶元年

案宋史作二年

析汧陽置隴安縣

鳳州 河池縣皇朝徙治固鎮 兩當縣皇朝徙治廣

鄉鎮

案宋史徙河池在開寶五年徙兩當在至道元年

秦州 建隆二年置伏羌寨熙寧三年以為城

鞏州

案文獻通考皇祐四年以渭州地置古渭寨熙寧五年改通遠軍崇寧三年改為鞏州此未詳

崇寧四年

案宋史作三年

陞寧遠寨為縣

案宋史元祐五年增置隴西縣崇寧三年

陞永寧寨為縣此闕載

熙河路

熙州 熙寧五年收復吐蕃之武勝軍置州陞鎮洮軍

節度 熙寧五年置渭源堡屬州

案宋史熙寧六年置狄道縣九年省元豐

二年復置

此闕載

蘭州 元豐四年收復金城縣

案宋史蘭州金城郡與此作金城縣有異又崇

寧三年置蘭泉縣此闕載

河州 熙寧六年收復鳳林縣置枹罕縣七年省 崇

寧四年陞寧河寨為縣

岷州 熙寧六年收復

原註唐和政郡陷吐蕃

崇寧四年復置

祐川縣

原註唐縣後廢

建隆三年以良恭大潭二鎮置大潭

縣屬秦州熙寧六年屬岷州 熙寧六年以長道縣屬

岷州

案宋史崇寧三年復祐川縣熙寧七年以大潭長道兩縣屬岷州與此稍異

會州

元符二年收復烏蘭縣

案文獻通攷唐置會州領會寧烏蘭二縣廣德

後沒吐蕃宋元符二年始進築修復到安西城以北六寨隸會州崇寧三年置縣曰敷文此云收復烏蘭縣仍唐舊名似下

文有脫佚

廓州

元符二年收復米川縣

案文獻通攷廓州唐末陷吐蕃宋元符二年以

廓州為寧塞城崇寧三年棄之後收復仍為廓州城下置一縣五年罷之大觀三年陞防禦又米川縣注云唐置廣德元年沒吐蕃宋元豐收復與此作元符二年有異至宋史則僅載米川城注云舊米川縣

洮州

元符二年收復臨潭縣

案文獻通攷洮州領縣一臨潭唐末陷吐蕃號

臨洮城元符二年得之尋棄不守大觀二年復仍為洮州三年阻困練此云收復臨潭縣亦沿舊名

湟州

案文獻通攷元符二年收復舊遼川城建為湟州此未詳

大觀三年賜嚮德軍

額宣和元年改為樂州

河東路

太原府 太平興國四年克復降為并州舊治太原晉

陽二縣遂徙治陽曲 太平興國四年省太原縣入榆

次 建隆四年以晉陽縣為平晉軍太平興國四年廢

為平晉縣熙寧三年省入陽曲政和五年復

潞州 太平興國元年改昭德軍節度

原註唐昭義軍節度

建中

靖國元年改隆德軍節度

慶祚軍 舊晉州趙城縣熙寧五年廢為鎮隸洪洞縣

元豐二年

案宋史作三年

復為縣政和三年陞為軍

麟州 乾德五年陞建寧軍節度端拱元年改鎮西軍

節度

嵐州 咸平五年以憲州樓煩縣來屬

憲州 熙寧三年廢十年復置 咸平五年以嵐州靜

樂縣來屬

慈州 熙寧五年廢入隰州元祐元年復置 熙寧五

年省文城縣入吉鄉縣又省鄉寧縣

豐州 嘉祐七年以府州薤泊川掌地置東南接府州

西接麟州不統縣

遼州 熙寧七年廢為平定軍元豐八年復置 熙寧

七年省和順縣為鎮入遼山元豐元年復置

案宋史熙寧七年省

平城和順二縣入遼山省榆社入武鄉元祐元年復置三縣與此有異

岢嵐軍 太平興國四年析岢嵐州置軍

案宋史太平興國五年以

嵐州嵐谷縣建為軍與此有異

寧化軍 太平興國四年析嵐州地置寧化縣五年于縣置軍領寧化一縣

威勝軍 太平興國二年置併沁州入焉 太平興國

二年以潞州武鄉縣來屬 太平興國六年廢沁州以

沁源縣來屬 太平興國六年廢沁州以綿上縣屬大

通監寶元二年來屬

案宋史太平興國三年于潞州銅

年置不載銅親

縣詳略互異

平定軍 太平興國七年改上父縣為平定縣置平定

軍

案宋史太平興國二年以鎮州廣陽寨建為軍四年以并州平定樂平二縣來屬改廣陽為平定即在四

年與此有異

保德軍 淳化四年析嵐州置定羌軍景德二年

案宋史作

元改曰保德

火山軍 太平興國七年以嵐州雄勇鎮置軍治平四

年置火山縣熙寧四年縣廢

晉寧軍 元祐二年置 大觀三年石州臨泉縣來屬

案宋史晉寧軍本葭蘆寨元豐五年收復六年隸石州元祐四年給賜西夏紹聖四年收復元符二年為晉寧軍割石州之臨泉隸焉又大觀三年以石州之定胡縣來屬所載視此加詳而紀年有異

淮南東路

亳州 大中祥符七年陞集慶軍節度 大中祥符七

年改真源縣為衛真縣

泗州 乾德元年以楚州盱眙縣來屬州徙治此 建

隆二年省徐城縣入臨淮 乾德元年以濠州招義縣屬泗州太平興國元年改為招信

真州 大中祥符六年以聖像成功陞為真州

案宋史至道二

年以揚州之六合來屬此闕載

通州 天聖元年改周通州為崇州明道二年復故名

淮南西路

壽州 開寶四年改盛唐縣為六安縣

無為軍 太平興國三年以巢縣之無為鎮置軍太

平興國三年以廬州巢縣來屬 太平興國三年以廬

州廬江縣來屬 無為縣熙寧三年析巢縣廬江縣地

置 巢縣太平興國三年自廬州來隸紹興五年廢為

鎮六年復十一年隸廬州十二年復隸

原註紹興六年六月一日知無

為軍呂雲叟言本軍巢縣廢為巢鎮之後所收官錢不
了鎮寨官兵請給又地里濶遠見不住招誘有歸業之
民內柘皋一鄉隸廬江縣往回五百餘里隆城一鄉往
回廬江縣六百餘里官司文移稽滯人戶難以輸納賊
盜驚判官司難以緝捕乞將巢鎮依舊為縣從之
興十一年八月十一日知廬州杜林言巢縣舊隸本州
因置無為軍遂割隸近緣本州賊馬毀壞城壁見于巢
縣寄治雖有三縣亦皆殘毀欲將巢縣權隸本州底得

就本縣財賦贍養官兵候將來稍見就緒移入廬州日
却撥還無為軍從之 十二年六月十五日知無為軍
趙士榮言本軍見今二稅未理止有果子未麥每場務
酒稅官錢應副官兵支遣去年正月內蒙朝廷將巢縣
並柘臯鎮權隸廬州雖存倚郭一縣外縣一縣
日近窘乏支遣不行乞將巢縣撥還本軍從之

光州 建隆元年改殷城縣為商城縣後省為鎮入固
始

兩浙路

案宋史兩浙路熙寧七年分為
兩路尋合為一南渡後復分

臨安府

淳化五年改寧海軍節度

原註唐為
鎮海節度

六年陞

杭州為府

太平興國四年改錢江縣為仁和縣 太

平興國三年改安國縣復曰臨安縣

原註晉武帝名曰臨安

太

平興國四年改新登縣為新城縣

案文獻通攷杭州宋屬浙西路淳化五年

陞南新場為縣崇寧五年省入新城又宋史云太平興國四年改唐山縣為昌化縣此皆未詳

平江府 太平興國三年改蘇州吳郡為平江軍

案文獻通

攷平江軍屬浙西路政和三年陞為府

潤州 開寶八年改鎮江軍節度

原註唐為鎮海軍節度

熙寧

五年省延陵縣入丹陽

案文獻通攷鎮江軍政和三年陞為府屬浙西路

常州 太平興國元年改義興縣為宜興縣 淳化元

年江陰軍廢以江陰縣來屬三年復置軍熙寧四年又

廢來屬

案文獻通攷常州屬浙西路

秀州 政和七年八月二十七日改秀州為嘉禾郡

案文

獻通攷屬浙西路

湖州 景祐元年改為昭慶軍節度

原註周為定德節度

太平

興國七年析烏程縣地置歸安縣 太平興國四年

案宋

史作三年以杭武康縣來屬

案文獻通攷湖州屬浙西路

睦州 宣和元年陞建德軍節度三年改為嚴州

案文獻通

政屬浙西路

越州 大觀元年陞為帥府

案文獻通攷屬浙東路

明州 建隆二年

案宋史作元年

改奉國軍節度

原註梁為望海軍節度

熙寧六年析鄞縣置昌國縣

案文獻通攷明州屬浙東路

溫州 石晉為靜海軍節度

案宋史本永嘉郡太平興國三年降為軍

政和

七年陞應道軍節度

案文獻通攷屬浙東路

台州 建隆元年復改台興縣為天台縣 景德四年

改永安縣為仙居縣

案文獻通攷台州屬浙東路

處州 咸平二年復改白龍縣為松陽縣

原註吳置縣
朱梁改長松

又曰白龍

案文獻

通攷處州屬浙東路

婺州 淳化元年改實寧軍節度

原註吳置東陽郡梁
陳置金華郡石晉為

武勝軍節度

案文獻

通攷婺州屬浙東路

衢州 乾德四年以常山縣地置開化場太平興國六

年陞為縣

案文獻通攷衢
州屬浙東路

江南東路

建康府 開寶八年降為昇州

饒州 開寶八年以餘干縣地置安仁場端拱元年陞

為縣

池州 開寶八年以江寧府銅陵縣來屬 太平興國

三年以江州東流縣來屬

案宋史開寶末以江寧青陽縣來屬此闕載

信州 開寶八年陞寶豐鎮為縣景祐二年省

案宋史作元年

康定元年復置慶厯三年又省入弋陽 開寶八年

案宋

史作淳化五年

以鉛山縣直隸京師後屬信州 熙寧七年復

陞永豐鎮為縣

原註唐置唐省

太平州 開寶八年改雄遠軍為平南軍太平興國二

年陞為太平州 太平興國三年以宣州蕪湖縣繁昌

縣來屬

南康軍 太平興國二年置

案文獻通攷作七年

太平興國七

年以洪州建昌縣江州都昌縣來屬

廣平軍 開寶八年置

案文獻通攷作廣德軍太平興國四年建

端拱元

年以郎步鎮置建平縣

寧國府 舊宣州乾道二年八月二十六日以孝宗潛

藩陞為府

江南西路

原註紹興元年以江洪筠袁虔吉州興國南康臨江南安軍為江南西路四年

撥南康軍依舊隸江南東路

洪州

太平興國六年析南昌縣置新建縣

案宋史崇寧二年陞

南昌縣進賢鎮為進賢縣此闕載

虔州

太平興國八年以險江鎮置興國縣以九州鎮

置會昌縣

吉州

太平興國九年置吉水縣

原註本吳吉陽縣地

至和元

年以報恩鎮置永豐縣 熙寧四年以萬安鎮置萬安縣

袁州 雍熙元年以宜春縣地置分宜縣

撫州 開寶三年以宜黃場復置宜黃縣

原註唐置縣後省

開寶五年以金溪場置金溪縣

筠州 太平興國三年

案文獻通攷作六年

以高安監步鎮置新

昌縣

興國軍 太平興國二年置 乾德五年以大冶場置

大冶縣屬鄂州太平興國二年來屬 太平興國二年
以鄂州通山縣來屬

南安軍 淳化元年置以虔州大庾縣建軍以縣為治
所以虔州南康縣上猶縣來屬

臨江軍

淳化三年置

案文獻通攷淳化三年以筠州之清江縣建臨江軍以吉州之

新淦縣袁州之新喻縣來屬永樂大典原本誤以上
條以虔州大庾縣以下十三字繫在此條下今改正

建昌軍 太平興國四年改建武軍為建昌 淳化二

年以撫州南豐縣來屬

宋朝事實卷十八

欽定四庫全書

宋朝事實卷十九

宋 李攸 撰

陞降州縣二

荆湖南路

潭州 淳化四年以衡州衡山縣岳州湘陰縣來屬

熙寧六年以益陽縣地置安化縣 太平興國七年

案文

獻通攷 作二年 析長沙縣置寧鄉縣

案宋史載開寶中廢長豐縣入長沙元符元年以長

沙五鄉潭縣兩鄉
為善化縣此闕載

衡州 乾德三年以安仁場置安仁縣析衡陽衡山二

縣地入焉

道州 熙寧五年省永明縣入營道縣元祐二年

案宋史作

年復置 乾德三年改延唐縣為寧遠縣省大歷縣入

寧遠

永州 雍熙元年以零陵縣之東安場置東安縣

郴州 太平興國元年改郴義縣為桂陽縣改義章縣

為宜章縣 熙寧六年改高亭縣為永興縣

邵州 熙寧五年收復梅山以其地置新化縣 元豐

四年以溪洞徽州為蔣竹縣 崇寧四年以臨口寨為

臨岡縣

武岡軍 崇寧五年陞武岡縣為軍以蔣竹縣分為綏
寧臨岡二縣隸焉

桂陽軍 本桂陽監景德元年以郴州藍山縣來屬

荆湖北路

江陵府 乾德三年以江陵縣地置潛江縣 乾德三年置建寧縣熙寧六年省入石首縣元祐元年復置

鄂州 開寶八年改臨江縣為崇陽縣 景德四年改

永安縣為咸寧縣

案文獻通攷熙寧五年陞通城鎮為通城縣此闕載

安州 熙寧二年省雲夢縣入安陸縣元祐元年復

案文

獻通攷安州宣和元年陞為德安府此闕載

復州 熙寧六年廢復置 熙寧六年州廢以景陵縣

屬安州省沔陽縣入監利縣後置州復來屬 乾德二

年以白沙院置玉沙縣屬江陵府至道三年以縣來屬
熙寧六年省入監利元祐元年復置

鼎州 大中祥符五年改武陵郡曰鼎州 乾德元年
析武陵縣置桃源縣

峽州 開寶八年省巴山寨入夷陵縣

岳州 淳化五年陞王朝場為縣至道二年改為臨湘
縣 乾德元年復朗州橋江縣為沅江縣來屬

歸州 熙寧五年省興山縣入秭歸後復置

案宋史元祐元年復

置

沅州 熙寧七年平溪洞地置沅州以潭陽縣地

原註唐為

欽州

置廬陽縣為州治

熙寧五年以龍標縣地置鎮江

寨元豐三年廢為鋪

熙寧七年以龍門縣地置龍門

鋪 元豐三年陞黔江城置黔陽縣

靖州

熙寧九年平溪洞復置誠州

元祐二年廢為

渠陽軍三年廢為寨屬沅州紹聖中復置誠州崇寧二

年改靖州

元豐六年置渠陽縣為誠州治改羅蒙縣

為通道縣

漢陽軍 熙寧四年廢屬鄂州元祐元年復置 太平
興國二年改汶川縣為漢川縣

荊門軍 開寶五年置熙寧六年廢元祐元年

案宋史作三年

復置初治當陽後治長林縣

成都路

成都府 太平興國六年降為益州端拱元年復陞成
都府劍南西川節度

原註唐改蜀郡為成都府又分為劍南西川節度

淳化元

年復為益州嘉祐四年復陞為府六年復為劍南西川

熙寧五年省犀浦縣為鎮入郫縣 天聖四年改靈

池縣為靈泉縣

眉州 太平興國元年改通義縣為眉山縣

蜀州 紹興十四年陞崇慶軍節度為府

案宋史作紹興十年陞崇

慶軍節度淳熙四年陞府

開寶四年改唐興縣為江源縣

案宋史作改唐

唐安縣為新津

彭州 開寶四年改唐昌縣為永昌崇寧中

案宋史作元年改

為崇寧

綿州 熙寧五年省西昌縣入龍安縣 熙寧九年以

茂州石泉縣來屬

嘉州 熙寧五年省平羌縣入龍遊縣 淳化四年以

眉州洪雅縣來屬 乾德四年省綏山縣入峨眉縣

邛州 熙寧五年省臨溪縣入臨邛縣

黎州 慶歷七年案宋史作六年省通望縣入漢源縣

茂州 熙寧七年案宋史作九年即汶川縣治置威戎軍使

簡州 熙寧五年省貴平縣入平泉縣

威州 景祐三年改維州為威州

原註屯田員外郎知祥符縣郭輔之奏切

見維州屬西川益州路與京東路濰州相去近六千里臣昨知維州日有廣南龔州淮南高郵軍京西陳州曾轉遞往東濰州遞角文字臣雖便遞往京東濰州及開封府曾轉遞到東濰州逃軍一名尋監送本路鈐轄司勘斷切緣逐州軍見有條刑禁轉遞往來一萬餘里動經三兩個月住滯兼濰州最是邊處監送到逃軍或至遠去走透深為不便欲乞別州名上曰非李德裕言吐蕃得此而號無憂城者耶侍者曰是因取地圖而觀之曰此足以威服西土八國遂改為威州

天聖元年改通化縣為金川縣

景祐四年復舊名

治平三年即縣治置通化軍

隆州 熙寧五年降陵州為陵井監政和三年

案宋史作宣和

四年改為仙井監

原註漢張道陵開陵州本朝不欲斥天師名改為仙井

隆興元年

復為州更名隆州 咸平四年省始建縣入井研縣

永康軍 乾德四年置熙寧五年廢元祐初復 乾德

四年以彭州導江縣蜀州青城縣來屬熙寧軍廢復屬

彭州蜀州元祐初復來屬

潼川路

潼川府 乾德四年改劍南東川節度為靜戎軍節度

太平興國三年改安靜軍重和元年十一月陞梓州為

潼川府

大中祥符五年改五城縣

案文獻通攷作玄武縣

為中江縣 乾

德四年以蜀招葺院置東關縣 熙寧五年省永泰縣

為鎮入鹽亭縣十年復置永泰尉司後改曰安泰

遂寧府 政和五年陞遂州遂寧郡為府 太平興國

元年復改方義縣為小溪縣

原註齊梁名縣曰小溪

果州 熙寧六年省流溪縣為鎮入南充縣

資州 乾德五年省月山丹山銀山三縣入盤石

案文獻通

攷作廢月山丹山銀山清溪四縣王存九域志謂三縣入盤石清溪入內江此似脫去清溪入內江句

普州 乾德五年

案文獻通攷作熙寧五年

省普康縣入安岳縣省

崇龕縣入安居縣省普慈縣入樂至縣

敘州 政和四年改戎州為敘州 乾德五年省開邊

縣歸順縣入犍道縣 政和四年省犍道縣入宜賓縣

太平興國元年改義賓縣為宜賓熙寧四年省

瀘州 宣和元年陞瀘川軍節度

原註晉江陽郡梁置瀘州唐為瀘川郡屬

劍南道領縣六瀘川富義涇南江安綿水合江

乾德四年廢綿水以富義置

監

案宋史大觀二年建純州置九支安溪兩縣三年建

涇州置承流仁懷兩縣以合江之安溪寨為縣隸純州宣和二年廢純州改九支縣為九支城三年又廢涇州為武都城以承流縣併入仁懷此皆闕載

合州 乾德三年改石鏡縣為石照縣

榮州 治平四年改旭川縣為榮德縣 熙寧四年省

公井縣入榮德縣 乾德五年省和義縣入威遠縣

渠州 景祐二年

案宋史作三年王存九域志亦作二年

省大竹縣入流

江縣

懷安軍 乾德五年以金水縣立軍

原註先是蔡州團練使曹翰上言遂

州取金水縣路至西川五百里其金水縣又是簡州大
路最居津要請建置為軍又西路轉運李鉉奏金水縣
路通徹東西兩川及遂果閬商客往來不絕及非時使
命文牒轉遞久遠無虞須是一路安靜方可得上件州
府遞相應接緣此縣自乾德四年所納見在戶稅夏秋
共五百貫有奇若仍舊此縣更屯駐兵士即人戶凋殘
賦稅全少必有供應不辦須是諸處般運又更因弊民
力若割漢州金堂縣共建一軍額不離鎮撫數州界人
戶亦商客往來急疾兩川文字報應及使臣經過並得
利濟其金水金堂相去五十里金水與三州軍水陸兩
路相接若置軍額 乾德五年以漢州金堂縣來屬
甚便故有是命

廣安軍 開寶二年置 開寶二年以渠州渠江縣果

州岳池縣合州新明縣來屬

富順監 乾德四年以富義縣地置富義監太平興國

元年改曰富順 治平元年置富順縣熙寧元年省

長寧軍 宋朝初置清井監政和四年改置軍

原註唐
羈縻長

寧等十州隸瀘州之地熙
寧八年夷人獻納十州地

利州路

利州 景祐四年改寧武軍節度

原註蜀陞昭
武軍節度

乾德

三年改脩山縣曰平蜀熙寧三年省入嘉川縣

案宋史
開寶五

年改益昌縣為昭化咸平五年以嘉川縣來隸此闕載

洋州 景祐四年改武康軍節度

原註蜀陞武定軍節度

乾德

四年省黃金縣入真符縣

閬州 乾德四年改安德軍節度

原註後唐陞保寧軍節度

乾德

五年

案文獻通攷作熙寧四年

省岐坪縣入奉國縣

劍州

熙寧五年省臨津縣入普安縣

案文獻通攷乾德五年廢永歸

縣此闕載

巴州

乾德四年省盤道縣入清化

咸平五年以靜

州清化縣屬集州 熙寧三年省七盤縣入思陽縣

乾德四年省歸仁縣熙寧五年省其章縣入曾口縣

熙寧五年以廢壁州通江縣來屬省廣納鎮白石縣入

通江縣

案宋史作省壁州白石符陽二縣入通江與此有異又乾德四年廢始寧縣熙寧五年省清化

縣入化城此闕載

蓬州 大中祥符五年更郎山縣

案宋史作唐朗池縣

為營山縣

熙寧三年省蓬山縣入營山縣 乾德三年省宕渠

縣入良山縣熙寧五年省良山縣入伏虞縣

大安軍 乾德五年以三泉縣直隸京師至道二年陞

為軍以興元府西縣屬焉三年軍廢復為縣而西縣還

故屬紹興七年

案宋史作三年

復為軍

夔州路

黔州 嘉祐八年省洪杜縣入泮水縣為寨

原註熙寧二年以泮

水縣為鎮

又省信寧縣都濡縣皆入彭水縣為鎮

達州 乾德三年更唐通州通川郡為今名 乾德五

年省閬英縣入新寧 熙寧六年省三岡縣七年省石

鼓縣分屬通川永睦新寧 乾德五年省宣漢縣入東鄉

忠州 熙寧五年省桂溪縣入墊江縣 乾德六年以夔州龍渠鎮屬南賓縣開寶二年置尉司

開州 慶歷四年廢新浦縣入開江縣改萬歲為清水縣

涪州 熙寧三年省溫山縣入涪陵縣

恭州 崇寧元年更唐渝州南平郡為今名 乾德三

年

案宋史作五年

省萬壽縣

雍熙五年省南浦縣入江津縣

珍州

大觀二年大駱解上下族帥駱世華駱文貴等

獻地東西四百五里南北三百五十一里以其地為珍

州亦曰樂源郡復立樂源縣為州治焉

原註珍州本唐珍州後屬高州

樂源縣本唐珍州屬縣

承州 大觀二年歲平帥任漢崇獻地東西三百五十

九里南北六百六十五里改為承州

原註本唐夷州地

領綏陽

都上洋川寧夷等縣皇朝收復但據夷人所指以置縣

然原其始析置移屬則都上近黔州寧夷近思州

秦州 熙寧七年招收唐秦州置榮懿寨屬南平軍崇

寧中復立秦州

案宋史作大觀二年復立秦州

梁山軍 開寶三年以石氏屯田務立軍以萬州梁山

縣為軍治 元祐元年七月二十五日詔梁山軍撥隸

萬州其稅租令逐年科折就本軍輸納 梁山縣開寶

三年以萬州梁山縣隸軍 熙寧五年又析忠州桂溪

縣地益焉

南平軍 熙寧八年招收西南蕃部以恭州南川縣銅

佛壩地置軍 隆化縣八年自涪州來隸 南川縣皇

祐五年置縣隸恭州 熙寧八年來隸尋廢為鎮隸隆化

縣元豐元年復

遵義軍 大觀二年蕃帥楊文貴獻地東西百二十里

南北六百一十二里以其地置軍 原註唐貞觀元年析
牂牁置遵義縣屬朗

州十一年州廢縣亦省十三年復立播州亦復置縣十
四年更名羅蒙十六年更名遵義後自播州徙州治唐

哀播州為楊氏兩族所分據一居播州一居遵義以江
水為界其後居播州者曰光榮得唐所給州銅牌居遵

義者曰文貴得州銅印大觀二年兩族各獻地皆自以
為播州議者以光榮為族帥重違其意乃以播州立州

遵義

立軍

大寧監 開寶六年立監于夔州大昌縣之鹽泉所

端拱元年以大昌來屬為監治

福建路

福州 太平興國二年復為威武軍節度

原註唐為威武軍後周改

彰正

太平興國五年復析閩縣置懷安縣

崇寧元

年更永泰縣為永福縣

天禧元年改永貞縣為永昌

縣乾興元年又改為羅源縣

建州 端拱元年陞建寧軍節度

原註本閩王氏鎮武軍節度南唐降為軍

事

治平三年析建安建陽浦城置歐寧縣與建寧分

治郭下熙寧三年省元祐四年復置 淳化五年陞崇

安場為縣 咸平五年陞關隸鎮為縣政和三年改為

政和縣

泉州 太平興國三年改平海軍節度

原註南唐為清源軍節度

淳化五年

案文獻通攷作太平興國六年

析晉江縣置惠安縣

南劍州 太平興國四年改劍浦郡為今名 太平興

國四年以建州將樂來屬

汀州 乾德四年復以唐汀州為汀州

原註南唐改為南州

淳

化五年陞上杭場武平場並為縣 元符元年析長汀

寧化置清流縣

漳州 太平興國五年以泉州長泰縣來屬

邵武軍 太平興國六年析邵武縣置光澤縣 太平

興國五年以建州之泰寧縣建寧縣來屬

興化軍 太平興國四年立軍于莆田縣之遊洋百丈
二鎮地初名太平軍尋改興化 太平興國四年以泉
州仙遊縣來屬 太平興國四年析莆田縣置興化縣
廣南東路

廣州 開寶五年省咸寧常康二縣入南海縣又省遊
水縣入懷集縣又省東莞縣入增城縣六年復置東莞
韶州 開寶五年省仁化縣入樂昌咸平三年復置

崇寧元年案文獻通攷作宣和三年以岑水場析曲江翁源縣地置

建福縣

循州 熙寧四年置長樂縣

端州 建中靖國元年陞興慶軍節度

案文獻通攷作元符三年陞興

慶軍節度徽宗即位以潘藩陞為肇慶府

開寶五年省平興縣入高要縣

熙寧六年以廣州四會縣來屬

新州 開寶五年省永順縣入新興縣 太平興國元

年改義寧縣為信安縣 熙寧五年省入新興 元祐元年

復置 紹聖四年又省

康州 開寶五年廢入端州尋復立六年廢瀧州入康

州

案文獻通攷紹興元年以高宗潛藩陞為德慶府

開寶五年省悅城都城

晉康三縣入端溪縣

開寶六年省廢瀧州鎮南安遂

建水三縣入瀧水縣

案文獻通攷作以瀧州之開陽建水嶺南三縣並入瀧水為一縣與

此有異

南恩州

案南恩州本恩州文獻通攷云慶厯八年改河北路貝州為恩州乃加南字

開寶

五年廢春州入恩州六年復立春州至大中祥符九年

又廢天禧四年復熙寧六年又廢入焉 開寶五年省

恩平杜陵二縣入陽江縣以廢春州陽春縣來屬六年
復立縣還屬焉 大中祥符九年州廢屬新州改曰新
春又天禧四年復立縣又屬焉熙寧六年州廢來屬

梅州 開寶四年改敬州為梅州熙寧六年州廢入潮

州元豐五年復立

案宋史敬州作恭州宋人以避翼祖諱故改曰恭南渡時翼祖已薨不應

復避故此作敬州宋史特因舊文耳

南雄州

案南雄州本雄州開寶四年以河北路有雄州加南字

改湏昌縣為保

昌縣 開寶四年以韶州始興縣來屬

英州 乾興元年改真陽縣曰真陽

案文獻通攷開寶六年以連州之浚

光縣來屬宣和二年賜郡名曰真陽此未詳

惠州 天禧五年改禎州為惠州

案文獻通攷以犯仁宗御名故改宣和二

年賜郡名博羅

廣南西路

桂州

案文獻通攷大觀時陞為帥府紹興三年以高宗潛藩陞為靜江府

嘉祐六年省

慕化縣入臨桂縣 乾德中溇州廢全義縣來屬太平

興國三年更名興安

容州 開寶五年廢繡禺順三州入焉

案文獻通攷開寶五年以繡州

之常林阿林羅繡三縣入普寧縣順州之龍豪溫水龍水南河四縣入陸川縣禺州之莪石扶萊羅辨陵城四

縣入北流縣

邕州

唐曰朗寧郡本朝改永寧郡

開寶五年省朗

寧思籠二縣入宣化縣

景祐二年省如和縣入宣化

縣

開寶五年省封陵縣入武緣縣

案宋史景祐二年廢樂昌縣入武緣

此闕載

融州

熙寧七年省武陽縣羅城縣入融水縣為鎮

象州 開寶七年廢嚴州入焉 開寶七年以廢嚴州

歸化縣入來賓縣

昭州 開寶五年廢富州熙寧五年廢蒙州皆入焉

熙寧五年蒙州廢以立山縣來屬 太平興國中改正

義曰蒙山熙寧五年省東區蒙山入立山 原註唐置東區正義二縣

屬蒙州 開寶五年廢富州以龍平縣來屬熙寧八年屬

梧州元豐三年復來屬 案文獻通攷開寶五年省思勤開江二縣入龍平此闕載

梧州 開寶五年省藤州之孟陵縣戎城縣入蒼梧六

年復置

案文獻通考作開寶五年廢孟陵熙寧四年省戎城並入蒼梧

藤州

熙寧四年廢南儀州入焉

開寶三年復儀州

曰南義州五年廢入賓州六年復置太平興國中改曰

南儀熙寧四年州廢以岑溪來屬六年省永業縣連

城縣入岑溪

龔州

開寶五年廢思明州

原註唐析龔象蒙三州地立思唐州置武郎思和二

縣開寶五年改州曰思明尋廢

省思和入武郎未屬省陽川武陵隋建

大同四縣入平南縣

嘉祐二年省武郎入平南

貴州 開寶四年改鬱平縣為鬱林縣五年省懷澤潮

水義山三縣入鬱林

柳州 景德三年改龍城縣為柳城縣

案宋史嘉祐四年廢象縣入洛

容此
闕載

宜州 慶歷三年廢芝忻州入焉 淳化元年以柳州

洛曹縣來屬後改曰洛下嘉祐七年省入龍水 熙寧

八年以環州思恩縣來屬 治平二年以智州河池縣

來屬

案宋史云南渡後增縣一河池又云河池縣不詳何年併省

賓州 開寶五年廢入邕州六年復立端拱三年廢澄

州入焉 天禧四年廢思剛州為遷江縣來屬 開寶

五年以廢澄州上林縣屬邕州端拱三年來屬省廢澄

州之止戈無虞賀水縣入上林

橫州 開寶五年省從化縣樂山縣入寧浦縣 開寶

五年

案文獻通攷作二年宋史作六年

省廢巒州之武羅靈竹二縣入

永定來屬 熙寧四年省永定入寧浦元祐三年復置

化州

案文獻通攷唐置潯州太平興國五年改名化州

開寶五年省陵罷龍

化二縣入石龍縣又廢羅州以吳川縣來屬又省羅州之廉江幹水零緣三縣入吳川

高州 開寶五年廢潘州熙寧四年廢竇州皆入焉

開寶五年省良德保定二縣入電白縣 太平興國元

年改竇州信義縣為信宜縣熙寧四年州廢來屬 開

寶六年省懷德縣潭莪縣亮縣入信宜 開寶五年省

廢潘州南巴潘水二縣入茂名縣來屬

雷州 開寶五年省遂溪徐聞二縣入海康縣

欽州 開寶五年省欽江遵化內亭三縣入靈山縣

景德三年改安京縣為安遠縣

鬱林州 開寶七年廢黨牢二州政和元年廢白州皆

入焉 開寶七年廢牢州定川宕川二縣入南流縣來

屬而自鬱林縣徙州治此又廢黨州省撫康善勞文山

懷義入南流縣 開寶五年省鬱平興德二縣入興業

縣 開寶五年廢白州省周羅建寧南昌三縣入博白

屬廉州七年復立政和元年又廢以博白來屬

瓊州 開寶五年以廢崖州之舍城縣來屬熙寧四年
省入瓊山 開寶五年以崖州之澄邁縣文昌縣來屬
廉州 開寶五年省封山蔡龍大廉三縣入合浦縣太
平興國八年省合浦入石康咸平元年復置 開寶五
年廢常樂州省博電零淦鹽場三縣以其地為石康縣
來屬

昌化軍 唐為儋州昌化縣熙寧六年廢州為軍太
平興國元年改義倫縣為宜倫縣熙寧六年省昌化縣

感恩縣為鎮入宜倫 元豐三年復置昌化縣四年復

置感恩縣 省洛陽縣入感恩縣

原註
開年

萬安軍 唐為萬安州萬安郡熙寧七年廢州為軍紹

興六年改萬安軍為萬寧縣十三年復 熙寧七年省

陵水縣為鎮入萬安元豐三年復置

案文獻通攷大觀元年以瓊州樂會

縣來隸
此闕載

朱崖軍 唐為振州延德郡開寶五年改為崖州熙寧

六年廢為軍

原註唐振州領寧遠延德吉陽臨川落屯五縣南漢省延德臨川落屯三縣

熙寧六年省寧遠吉陽縣為臨川藤橋二鎮紹興六年
復置

宋朝事實卷十九

欽定四庫全書

宋朝事實卷二十

宋 李攸 撰

經畧幽燕

唐貞觀初始置松漠府以靡會為都督賜姓李氏開元
中降以公主會昌中始賜契丹之印于是統有八部雄
據北漠懿僖之亂中國不靖後有安巴堅遂僭帝號抗
衡中國南侵鎮定邢洺冀貝之郡朱全忠時劉仁恭與

其子守光盜據幽薊政令苛虐燕人苦之逃入契丹安
巴堅撫存慰納不取租稅以致檀順平營之人亦多歸
之會後唐莊宗領兵入洛誅滅梁氏尋亦翦除劉守光
父子于是幽薊不復有抗捍焉安巴堅攻雲朔諸州安
次潞縣三河漁陽懷柔密雲等縣俘掠赤子萬數入蕃
至明宗約為兄弟且以解邊人之倒繫紓國家之外憂
安巴堅改元稱制分建京闕宮室官號盡依中國安巴
堅死子德光立會石敬瑭叛于河東遣趙瑩桑維翰等

奉使求援許以得志後割地為獻德光乃率兵十萬送敬瑭入洛冊為晉主名之為子遂割代北應朔寰雲蔚及范陽山前幽薊瀛莫涿易檀順及山後儒媯新武十六州以與之仍歲與帛三十萬疋供給稍稽則詬辱陵責及少主嗣立恥稱臣而稱孫自是有隙而兵始交矣詔天下點抽鄉兵七戶出一卒而四方于是騷然及景延廣矜橫磨之刃趙延壽希統天之業杜重威領兵而降于中渡張彥澤澤斬關而為彼鄉道邊馬嘶于宮闕戰

塵坐于河洛天地失常少主乃遷于黃龍府鬼神含怒
德光尋斃于藥城大順之時荒淫失政周世宗乘其衰
削遂奪其關南之地以瓦橋關為雄州以益津關為霸

州淤口關置寨

案周世宗兵下三關五代史載瓦橋關益津關而闕其一攷晁以道嵩山集

云三關謂淤口關瓦橋關益津關也與此書合

復破楊顯仁于高平至顯德二

年又遣劉崇襲府州為折德宸所敗觀其累世恃強負

勢侵削中土亦已甚矣契丹有五京

原註上京中京東京燕京西京也

上鎮十二

原註奉聖州雲州平州祖州懷州顯州乾州興中府建州宜州慶州黃龍府是也

中

鎮六

原註應州饒州白川州錦州番州蔚州也

下鎮七

原註湖州連州同州宣州可汗州寧州河

州觀察州十三

原註永利州利州高州耀州德州宜州坤思州遂州信州三河州咸州朝州營

州刺史上州九

原註涿州易州歸州化州保州昌州義州吉州昭延州也中州十一

原註瀛州順州儒州海州原州惠州濠州新州鳳州京州長安州也

下州三十四

原註睦州集州

衛州泉州宗州銀州巖州慈州陳州通州化州麓州朝州長春州鈐州澤州葉州嚴州溫州潤州般州蘭州番

州閭州雙州鐵州暉州渭州還州元州福州烏州金州懿州是也案此所載州名與遼史多不相合如衛陳

泉鈐葉溫般番暉還元等州皆不見遼史遼史有儀坤州此作坤思州遼史有檀薊瀋等州此又無之蓋以

宋人記遼地所聞歧異自京鎮等處土田豐好兵馬強而傳寫復不免脫訛也

盛地利物產頗有厚利其他自中下州固已寂寥荒漠然折長補短地利綿互周圍不過五千里計其所出所產未必敵河東河北州郡也其他方兵旅大約計之未必滿三十萬且自諸京統軍司及寨幕契丹兵不過十五萬奚家渤海兵不過六萬漢兒諸指揮不過一萬五千刺字父子軍五指揮不過數千鄉兵義軍不過三萬刺手背揀不中老弱兵不過七千然而分守諸州及河東河北接界州縣又東屯女羅女真新羅百濟野人國

狗國灰國黑水國西屯珠爾布固番遊獵國沃濟國室
韋國托歡番舒嚕國克項部族番達勒國川瓜沙州土
番遇野國土番夾山土番西番諸處寨戍縱少亦須十
萬方可分守外餘二十萬為戰鬪之兵若傾國而來亦
須留三萬人防守外餘一十七萬人其間亦有負糧持
器護從等不過止有十萬人其來不過一出梁門遂城
一出雄霸一出鴈門句注一出并代然而雄滄霸州以
來頗多澹水決河東注于我為便則雄霸以來不足為

慮矣又緣邊要害之處多張旗幟增加兵守晝飛沙塵
夜多烽火有二十萬人精兵足以禦之其次清野而待
之多方而誘之又選良將十餘人領兵十萬四出密襲
其巢穴自易州以東至于藥州以來一自紫荊嶺口路
一自白羊口連大安山路一自南口以北居庸關八答
嶺一自得勝口湯山口古北口一自遺安口燕市口一
自松亭關口白淀口一自首符家口大林土山口所至
攻其城邑盡受大將軍節會于幽州取山前郡則山後

州縣自下矣又命兵自梁門至虎北口石門或鴈門句
注以來設伏用奇要敵之兵斷其往來之路如此敵騎
進退失措滅之必矣凡此者廟堂之所宜知者也國初

天贊賢

案遼史景宗名賢初即位羣臣上尊號曰天贊皇帝此合尊號與名書之

遣兵攻鎮

定聞藝祖登極乃驚曰中國今有英武聖主吾豈敢以
螳螂而禦輒耶于是遁去先是五代時募民盜戎人馬
官給其直籍數以補戰騎之闕大祖受命務保境息民
不欲生事邊境盡令還前所盜馬仍申明條禁無得出

塞為盜未幾契丹入邊為棣州刺史何繼筠擊敗乾德二年昭義軍節度使李繼勳攻遼州州將杜延韜以城來降并人引衆步騎六萬復來援繼勳與彰德軍節度使羅彥瓌洺州防禦使郭進內客省使武懷節率馬步軍六萬人擊其衆于遼州城下敗之又攻平晉軍上遣郭進內客省使曹彬等領步騎萬餘赴之未至而遁

宋案

史乾德元年北漢引契丹攻平晉軍遣洺州防禦使郭進等救之此在乾德二年與史互異

三年冬

來攻易州畧居民上令監軍李謙昇率兵入其境俘生

口如所畧之數俟契丹放還易州之民然後縱之四年
正月又攻易州監軍任德義擊走之上令關南監軍及
雄霸瀛莫等四州刺史勒所部兵校獵于幽州之境以
耀威武四年天德軍節度使于延超與其子來降上以
延超為左千牛衛大將軍六月偽橫海軍節度桑維翰
降開寶二年太祖親征河東契丹兩道率衆來援一道
攻石嶺關為何繼筠所破一道攻定州為韓重斌擊敗
之是秋涿州刺史許周瓊來降上以為涿州刺史契丹

錫里伊里等凡一十六族歸款上以其大首領四人為懷化將軍八人為懷化郎將餘八十五人為歸德司戈是歲契丹主為其下所殺國人立明記為帝

案遼史景宗小字明

辰世宗子也穆宗遇弒乃即位

此書紀元篇

三年十月契丹以

六萬騎攻定州上遣判四方館事田欽祚領兵三千人赴之上戒欽祚曰彼衆我寡但背城列陣以待之敵至即戰勿與追逐欽祚于是與敵衆戰于滿城敵騎少卻乘勝逐北至遂城殺獲甚衆值夜入保遂城敵圍欽祚

數日欽祚度城中糧少是夜整衆突圍而出至保寨軍中不亡一矢北邊傳言三千折六萬太祖自是益修邊備嘗謂左右曰若契丹敢復犯邊我每以三十匹絹購一敵人之首其精兵不過萬人止費我三百萬匹絹此寇盡矣太祖一日內出取幽州圖以示宰相趙普謂曰卿意此圖孰能為者普詳觀歎曰他人不能為惟曹翰能為之帝問何以知之對曰方今將帥材謀無出于翰者陛下若使翰往必得幽州既得之後但不知陛下遣

何人代翰帝默然先是開寶九年正月羣臣上尊號曰
應天廣運一統太平聖文神武明道至德仁孝皇帝帝
曰今汾晉未平燕薊未復謂之一統可乎卻而不受帝
痛恨開運之禍華人百萬皆沒于契丹自即位專務節
儉乘輿服用一皆簡素別作私藏以貯供御羨餘之物
謂左右曰俟及三百萬貫我當移書契丹用贖晉朝陷
沒百姓然則帝欲大一統而復幽燕者其意在此不在
彼也七年十一月其涿州刺史耶律琮以書遺知雄州

孫全興曰琮受君恩猥當邊任臣無交于境外言則非
宜事有利于國家專之亦可竊思南北兩地古今所同
曷嘗不世載歡盟時通贄幣往者晉氏後主政出多門
惑彼彊臣忘我大義干戈以之日用生靈于是罹災今
茲兩朝本無纖隙若或交馳一介之使顯布二君之心
用息疲民重修舊好長為與國不亦休哉琮以甚微敢
干斯義遠希通悟洞垂鑒詳太祖命全興以書答焉八
年三月遣款附使格什古星什奉書來聘稱契丹國上

命閤門副使郝崇信至境上迓之及至館于都亭驛太祖召見賜以襲衣金帶銷金皂羅帽烏皮鞞器幣二百銀鞍勒馬具僉從衣物器幣有差宴于內殿仍召至便坐觀諸班騎射令其一使者與衛士馳射毛毬截柳枝及辭歸國召見賜器幣衣服帝因謂宰相曰自五代以來北敵強盛蓋由中原衰弱以至晉帝蒙塵亦否之極也今慕化而至乃期運使然非涼德能致左右皆稱萬歲自是契丹始與中國交聘八月遣使獻御衣玉帶名

馬太祖皆厚賜之因令其使人從獵近郊太祖親射走獸矢無虛發使者俯伏呼萬歲私謂譯者曰皇帝神武無敵射必命中所未嘗見也及平江南獻弓矢名馬九年長春節遣使貢御衣玉帶銀鞍勒馬太祖升遐遣使修聘禮太宗即位遣使獻御衣金玉鞍勒馬等賀太祖山陵獻馬金銀乾明節遣使來賀詔遣監察御史李瀆借太府卿閣門祇候鄭偉借右千牛衛將軍報聘開寶四年遣使問起居尋入寇石嶺關以援晉陽為郭進所

敗及王師既平河東詔發兗鄆齊魏貝博滄鎮冀邢磁
洺德易定祁瀛莫雄霸深趙等州及乾寧保塞等軍芻
粟赴北面行營分遣使督之將有事于幽薊六月十九
日車駕次金臺二十日帝躬擐甲胄率兵次東易州偽
刺史劉宇率官吏開門迎王師乞降二十三日未明次
幽州城南契丹衆萬餘屯于城北帝親率兵乘之斬首
千餘級餘黨遁去二十五日命諸將分兵攻城帝乘步
輦至城下督諸將進攻七月三日契丹偽武雄軍節度

使知順州劉廷素率官屬十四人來降五日偽節度使

知薊州劉守恩與官屬十七人來降六日幸城西北隅

督攻城七日詔班師二十八日車駕至自范陽

原註先是上平

并汾迴欲乘勝攻范陽諸將皆贊成其事至是以士卒疫癘轉輪迴遠日虞敵兵之至遂班師五年十

一月十日詔曰邊境多虞兵戎猶梗介冑之士息肩未

遑樽俎之籌折衝之暇兩河之際列陣相望烽火時至

于近郊羽檄尚馳于絕塞是用大興戈甲遂殄氛霾昔

者師人多寒楚子所以躬撫匈奴未滅漢武于是親巡

蓋以慰虎旅之心銷狼烽之氣雖在窮冬之候敢辭夙
駕之勞朕取此月暫幸邊陲親撫士卒應經過頓舍凡
百費用悉以官物充所在不得輒有裒斂又詔幽州朕
祇膺景命光宅中區右蜀全吳盡在提封之內東漸西
被咸歸覆育之中常令萬物以由庚每慮一夫之不獲
睹此北燕之地本為中國之民晉漢以來契丹竊據迨
今不復垂五十年國家化被華夷恩覃動植豈可使幽
燕輿壤猶違禮義之鄉冠帶遺民尚限邊荒之俗爰興

師律以正封疆拯溺救焚聿從于民望執訊獲醜即震
于皇威凡爾衆多宜體茲意今遣行營前軍都部署曹
彬等振旅長驅朕當續御戎軍親臨寇境徑指西樓之
地盡焚沙漠之庭灌燭火之微寧勞巨浸折蠡螽之股
豈待隆車應大軍入界百姓倍加安撫不得誤有傷殺
及發掘墳墓焚燒廬舍斬伐桑棗擄掠人畜犯者並當
處斬十三日車駕發京師十四日關南言破契丹萬餘
衆斬首三千餘級翌日從官詣行宮稱賀十九日駐蹕

于大名府雄州言契丹皆遁邊候徹警從臣稱賀上乘
勝欲進討幽州以問李昉扈蒙等事之可否昉等上奏
曰北方自古為寇乘秋犯塞往往有之一昨輒率甲兵
來擾疆境陛下櫛沐風雨衝冒嚴凝親御戎衣以攘民
害乘茲北兵畏威而逃因而翦之易于拉朽況幽薊之
壤久陷殊方慕化之心倒懸斯切今若擁百萬橫行之
衆弔一方徯后之民合勢而攻指期可定其如大兵所
聚糧餉是資況河朔之區連歲飛輓近經蹂躪尤極蕭

然雖存遇于豐穰恐不堪其調發屬茲寒冽益復罷勞
況今敵兵宵奔邊陲寧肅若親巡塞下振耀戎容固足
懼彼殘魂亦恐勞于大舉伏望申戒羽衛善養驍雄講
習武經繕修攻具俟府藏之充溢閭里之富盛暮歲之
間用師未晚上深納其言即日下詔南歸七年明記卒
有子三人隆緒隆慶隆裕至是隆緒立年十二歲母燕
燕專國政五月以三萬騎入邊潘美等分兵擊敗之十
月下詔北邊州軍曰朕受天景命奄宅中區以四海為

家兆民如子冀咸登于富壽豈務勝于甲兵況與契丹
本通鄰好昨以河東劉繼元不尊朝化盜據一方念彼
遺民行茲薄伐素非瀆武惟切弔民而契丹轉舉干戈
輒來救援一鼓既平于晉壘六師遂指于燕郊靡辭六
月之征聊報東門之役雖彼曲可見而罪已良多今聞
邊境謐寧田秋豐稔軍民所宜安堵無或相侵如今後
輒入北界擄掠及盜竊亦仰所屬州軍收捉重斷所盜
物竝送還之未幾錫里伊里等十一族七萬餘帳內降

者又三千帳羊馬萬計十二月高陽關捕得敵中首領
言契丹種族攜貳慮王師致討頗于近塞築城為備太
宗謂宰相曰北人以剽畧為務乃修城壘為自全之計
耳曩者劉繼元盜據汾晉周世宗及太祖皆親征不利
朕決取之為世宗太祖刷恥遂擒繼元至闕下今日視
之猶几上肉耳當其保堅城結契丹為援豈易制乎宋
琪對曰臣少陷北庭備知戎馬之數自晉末始強盛然
種類蕃多其心不一自石嶺關之敗及平繼元緣邊諸

郡頻有克捷以臣度之其部下攜貳必矣國家不須致討可坐待其滅亡後上謂宰相曰數有人自北邊來偵知敵中事自朝廷增修邊備北人甚懼昔晉漢衰弱邊陲無盡節之臣大率張皇事勢以要恩寵為自利之計今之邊將皆朕所推擇咸能盡心無復襲舊態也幽州四面平川無險阻可恃難于控扼異時收復幽州當于古北口以來據其要害不過三五處屯兵設堡寨自絕南牧矣

原註古北口兩傍皆峻崖中有路僅容車轍口北有鋪穀弓連繩本范陽控扼契丹之所最為

臨東琪對曰范陽是前代屯兵建節之地古北口及松亭

關野狐關三路竝設堡障至今石壘基堞尚存將來定

幽朔止于此數處置戍可也雍熙初知雄州賀令圖與

其父岳州刺史懷浦等上言

案李燾長編賀令圖及懷浦與文思使薛繼昭軍器

庫使劉文裕崇儀副使侯莫陳利用等相繼上言幽州可取狀較此所載為詳

契丹主幼國事

皆決于母葉葉大將韓德讓寵倖用事請乘其釁以取

幽州太宗以為然雍熙三年大發師以天平軍節度曹

彬為幽州行營前軍都總管出涿州河陽節度崔彥副

之馬軍都指揮使米信為幽州西北道行營都總管出
雲中代州觀察杜彥圭副之步軍都指揮使田重進為
定州路行營都統出飛狐口蘄州刺史譚延美副之忠
武軍節度使潘美為靈應州行營都總管出鴈門靈州
觀察使楊業副之是時權知高麗國王治遣使修貢京
師帝以王師北征其國與契丹接境常為其所侵乃命
監察御史韓國華假太常少卿往使其國降詔諭之曰
朕誕膺丕構奄宅萬方草木蟲魚罔不蒙澤華夏蠻貊

罔不率俾蠢茲北方敢拒皇威倔強沙漠之中遷延歲
月之命幽薊之地本被皇風曩以晉漢多虞契丹因而
盜據詩云我疆我理南東其畝今國家照臨所及書軌
大同豈使齊民陷茲朔漠今已董齊師旅殄滅塵氛元
戎啓行分道間出即期誅翦以慶混同惟王久慕華風
素懷明畧輸此忠勤之節撫茲禮義之邦而接彼境壤
困于蔓毒舒泄積憤其在茲乎便可申戒師徒迭相倚
角叶此鄰國同力盪平奮其一鼓之雄戡此垂亡之敵

良時不再王其圖之應擄獲生口牛羊財物器械並給
本國將士用申賞勸于是彬下固安城又下新城重進
戰飛狐南斬首五百級美攻寰州刺史趙彥辛來降又
克涿州美進圍朔州其節度副使趙希贊以城降契丹
以萬騎來援飛狐口重進大破之擒其將大鵬翼康州
刺史馬頴案長編載監軍馬頴及副將何萬通並為彬所擒與此詳畧互異彬又戰涿
州南斬首千餘級殺奚宰相賀斯美遂圍應州其節度
副使艾正以城降重進攻飛狐又下靈丘四月美克靈

州蔚州押衙李存璋等以城來降初太宗謂彬曰朕令
潘美出鴈門先取靈應卿以大軍聲言取幽州而持重
緩行敵聞之必聚勁兵于彼不復出援山後矣既美果
下寰朔靈應重進得山後要害地太宗疑彬進兵速而
讓道不繼彬乃留涿州旬日食果盡還軍以援供饋上
聞之曰安有大敵在前而退軍就食者即遣使止之令
引軍沿白溝河與米信合待潘美盡得山後之地然後
東取幽州彬之諸將至是聞美等屢戰勝自以持重兵

而功少遂欲傲功彬不得已于是裹五十日糧再趨涿州且行且戰歷二十日始至城中屬盛暑士卒疲乏不能進還至歧溝契丹躡戰王師遂敗彬宵涉拒馬河營于易水之南彥進亦為契丹所敗奏至詔諸將分屯沿邊諸郡召彬彥進等還闕留田重進守中山令潘美還代州遣使部徙靈應寰朔四州民五萬戶及其吐渾突厥三部落安慶等族八百餘帳分置于河南孟曹汝洛等四處是年冬復攻易州自曹彬失律諸將多坐黜免

至是上復思宿將劉廷讓宋偓張永德時皆罷節制在
環衛上欲令進擊自效遂遣廷讓屯雄州偓屯霸州永
德屯定州廷讓與敵戰君子館軍敗僅以身免先鋒賀

令圖高陽關部署楊重進沒焉

原註賀令圖少謹愿太宗在藩邸以隸左右即

位改綾綿副使知莫州雍熙二年領平州刺史幽州行
營濠寨使令圖握兵邊郡十餘年恃藩邸舊恩每歲入
奏多言邊塞利害及幽薊可取之狀上信之故有歧溝
之舉既而師敗議者皆咎令圖貪功生事復輕而無謀
敵將耶律遜寧號裕悅者使謀給令圖曰我獲罪本國
旦夕願歸南朝無路自拔幸君侯少留意焉令圖不虞
其詐自以終獲大功私遺以重錦十兩是年十二月敵
將裕悅率衆入攻大將劉廷讓與戰于君子館令圖為

先鋒敵圍我師數重裕悅傳言軍中願得見雄州賀使君令圖嘗為所紿意其來降即引麾下百十騎逆之將至其帳百步外裕悅據胡牀罵曰汝小子年在乳臭乃今送死來耳命左右盡殺其從騎反縛令圖與其父首謀北伐一歲中父子皆陷焉敵復入深析陷易州殺畧甚衆上為下

哀痛之詔大發兵戍鎮定高陽關四年正月詔問文武羣臣詢平寇之策又議作方田為戰守之備上乃以手詔諭緣邊將帥曰夫料敵之強弱古人以為難前歲之舉蓋救民之塗炭蠢茲北寇敢肆憑陵蹂踐我士民攻掠我城寨朕定必勝之策畫必當之計將以保民安邊

畧舉大意且戎人勝則深入而不相讓敗則逃竄而不相救固不可力戰也又皆騎兵利于平陸馳逐來往難于羈制固不可追奔也若棄小城就大鎮但屯兵于鎮定瀛莫之間其緣邊城寨必苦于寇掠固不可分兵也悠久之謀在于設險若乃決大河築長城又徒自示弱為後代笑朕今立法令緣邊作方田已頒條制量地里之遠近列置寨柵此可以限其戎馬而大利我之步兵雖使彼衆百萬亦無所施其勇自春至秋其功告成持

重養銳挫彼強敵如此則復幽薊滅林胡有日矣淳化
元年上遣使至定州密諭旨于都部署李繼隆曰若將
來復入邊朕當自行繼隆上奏以謂扞城禦侮臣等之
責況薊爾殘衆豈煩戎輅親舉言甚懇切至道元年正
月其將韓德威率衆萬騎誘党項十六大首領自振武
入攻府州折彥卿大敗其衆四月復攻雄州知州何承
矩敗之梟鐵林大將一人

宋朝事實卷二十

江陽譜

李攸字好德政和初編輯西山圖經九域志等書瀘帥

孫義叟招

原註下有
關文

書上轉一官張公浚入朝約與俱以

家事辭手編皇朝事實起建隆迄宣和凡六十卷其三

十卷先聞于時有旨制司上太常少卿何麒言請命以

宮觀居家終其書後以餘三十卷上之緘封副本并贄

啓秦相檜啓云方今雖為中興其實創業作事成于果

斷亦貴聽言思始議之艱危尚軫鈞懷之惴慄已室申

張之欲方和傳說之羹宜俊又旁招于庶位之中無顏色拒人于千里之外更願無忘在莒居寵思危秦怒寢其書不報今藏于家



宋朝事實卷末